



歷代名賢列女姓氏譜卷之百十九

湘湘

蕭智漢雲澤氏纂輯

男秉信明甫氏校

去聲

五末

費氏

亦音祕姬姓懿公之孫費伯之邑也今沂州費縣西北二十里故費城是約幸臣費仲夏禹之後也楚有費無極又費連氏改爲費氏虜姓也

歷代名賢

費直字長翁東萊人也治易爲郎至單父合長于卦筮亡章句徒以彖象繫辭十篇文言解說上下經琅邪王璜平中能傳之璜又傳古文尙書

姓氏譜

卷九

五末

費氏

一

費長房汝南人也曾爲市掾市中有老翁賣藥懸一壺于肆頭及市罷輒跳入壺中市人莫之見唯長房于樓上觀之異焉因往再拜奉酒脯翁知長房之意其神也謂之曰子明日可更來長房旦日復詣翁翁乃與俱入壺中唯見玉堂嚴麗旨酒甘肴盈衍其中共飲畢而出翁約不聽與人言之後乃就樓上候長房曰我神仙之人以過見責今事畢當去子寧能相隨乎樓下有少酒與卿爲別長房使人取之不能勝又令十人扛之猶不舉翁聞笑而下樓以一指提之而上視器如一升許而二人飲之終日不盡長房遂欲求道而顧家人爲憂翁乃斷一青竹度與長房身齊使懸之舍後家人見之卽長房形也以爲縊死大小驚號遂殯葬之長房立其傍而莫之見也于是遂隨從入深山踐荆棘于羣虎之中留使獨處長房不恐又卧于空室

以朽索懸萬斤石于心上衆蚩競來齧索且斷長房亦不
移翁還撫之曰子可教也復使食糞糞中有三蟲吳穢特
甚長房意惡之翁曰子幾得道恨于此不成如何長房辭
歸翁與一竹杖曰騎此任所之則自至矣既至可以杖投
葛陂中也又爲作一符曰以此主地上鬼神長房乘杖須
與來歸自謂去家適經旬日而已十餘年矣卽以杖投陂
顧視則龍也家人謂其久死不信之長房曰往日所莖但
竹杖耳乃發冢剖棺杖猶存焉遂能醫療衆病鞭笞百鬼
及驅使社公或在他坐獨自恚怒人問其故曰吾責鬼魅
之犯法者耳汝南歲歲常有魅僞作太守章服詣府門權
鼓者郡中患之時魅適來而逢長房謁府君惶懼不得退
卽前解衣冠叩頭乞活長房呵之云便于中庭正汝故形
卽成老鼈大如車輪頸長一丈長房復合就太守服付其

氏姓譜

卷五

五末

費氏

二

一札以敕葛陂君魅叩頭流涕持札植于陂邊以頸繞之
而死後東海君來見葛陂君因緝其夫人于是長房劾繫
之三年而東海大旱長房至海上見其人請雨乃謂之曰
東海君有罪吾前繫于葛陂今方出之使作雨也于是兩
立注長房會與人共行見一書生黃巾被裘無鞍騎馬下
而叩頭長房曰還他馬赦汝罪人問其故長房曰此狸也
盜社公馬耳又嘗坐客而使至宛市鮮須臾還乃飯或一
日之間人見其在千里之外者數處焉後失其符爲衆鬼
所殺

費汎字仲慮吳興人以孝廉除郎中屯騎司馬遷蕭令視
民如子先教後罰在位九年百姓移風惡慝不作奸寇不
發廣增怨銷推讓道生三年不斷獄正祥感應時沛有蝗
獨不入界由此顯名朝廷嘉之拜梁相子鳳

賈賚南安人公孫述據蜀時徵之賚漆身爲癩佯狂以避
述亡光武徵爲合浦太守

三國

費詩字公舉犍爲南安人也劉璋時爲縣竹令先主攻巖
竹時詩先舉城降成都既定先主領益州牧以詩爲督軍
從事出爲梓潼太守還爲州前部司馬先主爲漢中王遣
詩拜關羽爲前將軍羽聞黃忠爲後將軍羽怒曰大丈夫
終不與老兵同列不肯受拜詩謂羽曰夫立王業者所用
非一昔蕭曹與高祖少小親舊而陳韓亡命後至論其班
列韓最居上未聞蕭曹以此爲怨今漢王以一時之功隆
崇于漢室然意之輕重寧當與君侯齊乎且王與君侯譬
猶一體同休等戚禍福共之愚爲君侯不宜計官號之高
下爵祿之多少爲意也僕一介之使銜命之人君侯不受

氏姓譜

卷五

五末 費氏

三

拜如是便還但相爲惜此舉動恐有後悔耳羽大感悟遠
卽受拜後羣臣議欲推漢中王稱尊號詩上疏曰殿下以
曹操父子偏主篡位故乃羈旅萬里糾合士衆將以討賊
今大敵未克而先自立恐人心疑惑昔高祖與楚約先破
秦者王及屠咸陽獲子嬰猶懷推讓况今殿下未出門庭
便欲自立邪愚臣誠不爲殿下取也由是忤旨左遷部丞
昌從事建興三年隨諸葛亮南行歸至漢陽縣降人李鴻
來詣亮亮見鴻時蔣琬與詩在坐鴻曰間過孟達許適見
王冲從南來言往者達之去就明公切齒欲誅達妻子賴
先主不聽耳達曰諸葛亮見顧有本末終不爾也盡不信
冲言委仰明公無復已已亮謂琬詩曰還都當有書與子
度相聞詩進曰孟達小子昔事振威不忠後又背叛先主
反覆之人何足與書邪亮默然不答亮欲誘達以爲外援

竟與達書後蔣琬秉政以詩爲諫議大夫卒于家

費禕字文偉江夏鬪人也少孤依族父伯仁伯仁姑益州牧劉璋之母也璋遣使迎仁仁將禕遊學入蜀會先主定蜀禕遂留益土與汝南許叔龍南郡董允齊名時許靖喪子允與禕欲共會其塋所允白父和詰車和遣開後鹿車給之允有難載之色禕便從前先上及至喪所諸葛亮及諸責人悉集車乘甚鮮允猶赭色未泰而禕晏然自若持車人還和問之知其如此乃謂允曰吾當疑汝于文偉優劣未別也而今而後吾意了矣先主立太子禕與允俱爲舍人遷庶子後主踐位爲黃門侍郎丞相亮南征還羣寮于數千里逢迎年位多在禕右而亮特命禕同載由是衆人莫不易觀亮以初從南歸以禕爲照信校尉使吳孫權性既滑稽嘲啁無方諸葛恪羊衝等才博果辯論難鋒至

氏姓譜

卷九

五末 費氏

四

禕辭順義篤據理以答終不能屈權甚器之謂禕曰君天下淑德必當股肱蜀朝恐不能數來也還遷爲侍中亮北住漢中請禕爲參軍以奉使稱旨頻煩至吳建興八年轉爲中護軍後又爲司馬值軍師魏延與長史楊儀相憎惡每至竝坐爭論延或舉刀擬儀儀涕泣橫集禕常入其坐間諫喻分別終亮之世各盡延儀之用者禕匡救之力也亮卒禕爲後軍師頌之代蔣琬爲尚書令琬自漢中還涪禕遷大將軍錄尚書事延熙七年魏軍次于興勢假禕節率衆往禦之光祿大夫來敏至禕許別求共圍碁于是羽檄交馳人馬擐甲嚴駕已訖禕與敏留意對戲色無厭倦敏曰向聊觀試君耳君信可人必能辨賊者也禕至敵遂退封成鄉侯琬固讓州職禕復領益州刺史禕當國功名畧與琬比十一年出住漢中自琬及禕雖自身在外慶賞

刑威皆遙先諮斷然後乃行其推任如此十四年夏還成
都成都望氣者云都邑無宰相位故冬復北屯漢壽延熙
十五年命禕開府十六年歲首大會魏降人郭循在坐禕
歡飲沉醉爲循手刃所害謚曰敬侯子承嗣爲黃門侍郎
承弟恭尙公主禕長女配太子璿爲妃

費賓伯名觀江夏鄘人也劉璋母觀之族姑璋又以女妻
觀觀建安十八年參李嚴軍拒先主于綿竹與嚴俱降先
主既定益州拜爲神將軍後爲巴郡太守江州都督建興
元年封都亭侯加振威將軍觀爲人善于交接都護李嚴
性自矜高護軍輔匡等年位與嚴相次而嚴不與親襲觀
年少嚴二十餘歲而與嚴通狎如時輩云年三十七卒

南

費于代人也祖峻仕赫連昌爲寧東將軍泰常末率衆來

氏姓譜

卷九

五末

費氏

五

降拜龍驤將軍賜爵健爲公後遷征南將軍廣阿鎮大將
徙爵下邳公父郁以隨父歸誠勳賜五等男除燕郡太守
卒贈幽州刺史于少有節操起家內三郎世祖南伐從駕
至江以宿衛之勤除寧遠將軍賜爵松陽男遷商賈部二
曹令除平南將軍懷州刺史卒子萬襲

費穆字朗興于之孫也性剛烈有壯氣頗涉書史好尙功
名世宗初襲男爵稍遷涇州平西府長史時刺史皇甫集
靈太后之元舅恃外戚之親多爲非法穆正色匡諫集亦
憚之後蠕蠕主婆羅門自涼州歸降其部衆因饑侵掠邊
邑詔穆銜命宣慰便皆款附明年復叛入寇涼州除穆兼
尙書左丞西北道行臺仍爲別將往討之穆至涼州蠕蠕
遁走穆謂其所部曰夷狄獸心見敵便走若不合其破膽
終恐疲于奔命乃簡練精騎伏于山谷使羸劣之衆爲外

營以誘之賊騎覘見俄而競至伏兵奔擊大破之及六鎮
反叛詔穆爲別將隸都督李崇北伐都督崔暹失利崇將
議班師以朔州是白道之衝賊之咽喉若不全則并肆危
矣今欲選將鎮捍不知誰堪此任僉曰無過穆者崇乃誦
爲朔州刺史尋改除雲州刺史穆招集離散頗得人心時
北境州鎮皆沒唯穆獨存久之援軍不至穆乃棄城南走
投尔朱榮于秀容旣而詣闕請罪詔原之孝昌中以都督
討平二絳反蜀拜散騎常侍後妖賊李洪于陽城起逆連
結蠻左詔穆兼武衛將軍擊破之及尔朱榮向洛靈太后
徵穆令屯小平榮推奉莊帝穆遂棄衆先降穆素爲榮所
知見之甚悅穆潛說榮曰公士馬不出萬人今長驅向洛
前無橫陳者正以推奉主上順民心故耳今以京師之衆
百官之盛一知公之虛實必有輕侮之心若不大大行誅罰

氏姓譜

卷九

五末

賈氏

六

東樹親黨公還北之日恐不得度太行而內艱作矣榮心
然之于是遂有河陰之事天下聞之莫不切齒榮入洛穆
遷吏部尚書魯縣開國侯進封趙平郡公與大將軍元天
穆討平邢杲時元顥入京師穆與天穆旣平齊地回師將
擊顥穆圍虎牢將拔屬天穆北渡旣無後繼穆遂降顥顥
以河陰酷濫事起于穆引入詰讓出而殺之時年五十三
莊帝還宮追贈侍中司徒公諡曰武宣

賈昶江夏人嘗爲樂府又作鼓吹曲梁文帝重之歎曰才
意新拔有足嘉異昔山惲博物昶簡巧詞實附勸善賜絹
十疋

賈

賈冠卿青陽人旣登第聞母病革馳歸而母已塋遂廬墓
以終喪歎曰干祿養親耳得祿而親喪何以祿爲再詔不

起杜荀鶴詩凡弔先生者多傷荆棘間不知三尺墓高却
九華山

費襄雙流人至孝母病割股進之遂愈母歿身自負土廬
墓終身產業多推其兄云

元

費著華陽人進士授國子助教有時名居母喪盡禮哀毀
骨立歷漢中廉訪使調重慶府總管明玉珍攻城著遁屠
犍爲而卒兄克誠擢第時人謂成都二費

費孝子未詳其名亦不知何地人爲小卒遭亂失母不相
見者二十年與人言輒流涕嗚咽聞于主將予假令尋母
行次澧州城邊得之主將爲請于朝賜金帛其身克終養

明

費聚字子英五河人父德興以材勇爲游徼卒聚少習技

氏姓譜

卷五

五末

費氏

七

擊太祖遇于濠偉其貌深相結納定遠張家堡有民兵無
所屬郭子興欲招之念無可使者太祖力疾請行偕聚騎
而往步卒九人俱至寶公河望其營甚整弓弩皆外向步
卒懼欲走太祖曰彼以騎躡我走將安往遂前抵其營招
諭已定約三日太祖先歸留聚俟之其帥欲他屬聚還報
太祖復偕聚以三百人往計縛其帥收卒三千人豁鼻山
有秦把頭八百餘人聚復招降之遂從取靈璧克泗滁和
州授承信校尉旣定江東克長興立永興翼元帥府以聚
副耿炳文爲元帥張士誠入寇擊敗之召領宿衛援安豐
兩定江西克武昌皆從改永興翼元帥府爲永興親軍指
揮司仍副炳文爲指揮同知士誠復入寇獲其帥宋興祖
再敗之士誠奪氣不敢復窺長興隨征淮安湖州平江皆
有功進指揮使湯和討方國珍聚以舟師從海道邀擊浙

東平復由海道取福州破延平歸次昌國剿海寇葉陳二
姓于蘭秀山至是聚始獨將洪武三年會大軍取西安改
西安衛指揮使進都督府僉事鎮守平涼三年封平涼侯
歲祿千五百石予世券時諸將在邊屯田募伍歲有常課
聚頗耽酒色無所事事又以招降無功召還切責之明年
從傅友德征雲南大戰白石江禽達里麻雲南平進取大
理未幾諸蠻復叛命副安陸侯吳復爲總兵授以方畧分
攻闕索嶺及呵咱等寨悉下之蠻地始定置貴州都指揮
使司以聚署司事十八年命爲總兵官帥指揮丁忠等征
廣南禽火立達俘其衆萬人還鎮雲南二十三年召還李
善長敗語連聚帝曰聚曩使姑蘇不稱旨朕嘗置責遂欲
反即竟坐黨死爵除子超征方國珍没于陣璿以人材舉
官江西參政孫宏從征雲南積功爲右衛指揮使坐奏對
不實戍金齒

氏姓譜

卷九

五末

費氏

八

費子賢不詳其所始從太祖渡江爲廣德翼元帥數有功
取武康又取安吉築城守之張士誠兵數來犯輒敗去最
後張左丞以兵八萬來攻子賢所部僅三千人而守甚固
設車弩城上射殺其梟將二人敵乃解去以功進指揮同
知取福建克元都定西俱有功授大都督僉事世指揮使
費璽鄱陽人洪武初以賢良徵爲吉水知州寬惠得民擢
知漢中歲凶盜起發倉粟十餘萬斛貸民俾秋成還倉盜
聞皆來歸令占宅自爲保伍得數千家帝聞而嘉之後坐
事被逮以有善政特釋爲寶鈔提舉十一年帝謂吏部曰
資格爲常流設耳有才能者當不次用之超擢者九十五
人而拜震戶部侍郎尋進尙書奉命定丞相御史大夫以
下歲祿之制出爲湖廣布政使以老致仕

費瓚定遠人祖愚洪武時爲燕府左相改授燕山中護衛指揮使傳子肅至瓚從成祖起兵有功累進後軍都督僉事永樂八年春涼州衛千戶虎保永昌衛千戶亦合與巴等叛衆數千屯據驛路新附伯顏帖木兒等應之西鄙震動都指揮李智擊之不勝賊聲言攻永昌涼州城皇太子命瓚往討至涼州智及都指揮陳懷以師會遂進兵鎮番遇賊于雙城瓚擊其左懷等擊其右賊大敗走斬首三百餘級追奔至黑魚海獲賊千餘馬駝牛羊十二萬虎保等遠遁乃班師十二年充總兵官鎮甘肅瓚以肅州兵多糧少脫有調發猝難措置請以臨鞏稅糧付近邊軍丁轉運又以涼州多閒田請給軍屯墾從之洪熙元年予平羌將軍印永樂時諸邊率用宦官協鎮恣睢專軍務瓚亦爲所制仁宗知之賜璽書責之曰爾以名臣後受國重寄乃俯

氏姓譜

卷九

五末

費氏

九

首受制于人豈大丈夫所爲其痛自懲艾圖後效瓚得書陳謝宣宗嗣位進右府左都督元年七月入朝封崇信伯祿千一百石從征高煦次流河驛帝念前鋒薛祿軍少命瓚帥兵益之還予世券復鎮甘肅二年沙州衛賊屢劫撒馬兒罕及亦力把里貢使瓚討破之明年卒于鎮瓚爲人和易善撫士在鎮十五年境內寧謐子釗嗣從征鄧茂七還掌都督府天順中受武定侯郭英次孫昭賂誣嫡孫昌不孝欲奪其爵法司請逮治詔解府事卒子淮嗣爵傳至明亡乃絕

費曾謀鉛山人少師宏裔也由鄉舉知通許甫四旬賊猝至曾謀召父老曰我死若輩以城降可免屠戮北向再拜抱印投井死

費傑字世產以醫承其家性古慤淳篤邑人患劇疾雖百

里外必迎候傑至投一二劑輒效傑以故醫益顯嘗設藥
餌以週邑之貧獨墓疏遠無歸者數十人嫁外姓之孤者
五人時劉憲使患熱症或誤投以桂附瀕死傑亟疏治之
乃甦竟不居其功憲使甚賢之郡守戴琥尤重其雅誼加
賓禮焉所著有畏齋詩稿名醫抄經驗良方爲世所宗傑
子愚登進士官大理評事

費敬字行簡任大理寺左寺副比百疑獄必詳情以求其
生兩考餘平反總五萬計濟活三千餘人時河東薛瑄以
儒碩爲少卿甚推重焉敬平居以貪利爲戒當官以愷悌
存心謝人事絕足公府勤于課子依家規四十餘條卒年
七十二

費璠鉛山人天性孝友事親養志親歿謹廟祭雖遇遠忌
哀慕如初喪兄弟義居每食合諸房尊幼男女以類聚一

氏姓譜

卷五九

五末 費氏

十

人弗至不食也子宏案旣貴愈儉約自持常語子姪曰吾
先世慈祥謙約以有今日汝能守此則慶祉永延孝莫大
焉鄉人有以闕節請者懸束草于門謝之曰某若開口行
嚙卽嚙此草終其身無私干章楓山爲之傳曰公之所立
不出彝倫日用之常而各盡其所當爲真足以爲訓也

費愚字希顏烏程人少警敏質直與王華屠勳孫清輩友
授南陵訓導有文譽舉入宛陵書院督誨士子條分節解
無間寒暑諸生貧乏者捐俸助之嘗署寧國太平績溪南
陵四縣事清約自守撫民若子時有僞爲干戶校尉以拿
豪宦葉本義爲名者意掠公帑愚覺其僞密合擒之發其
篋俱短兵藥矢事聞監司薦云士林經濟尋陞湖廣麻城
知縣卒自號古直居士嘉靖間人注經王珂仕嘉湖時道
門請像瞻拜涕泗其感人多類此

費廣字隱之景泰癸酉舉人歷賓連二州學正遷銅鼓衛
教授陞南雍助教尋致仕所至櫜櫓諸生爲藝林推重後
舉祀鄉賢

費宏字子充鉛山人甫冠舉成化進士第一授修撰宏治
中遷左贊善進左諭德武宗立擢太常少卿預修孝宗實
錄充日講官正德二年拜禮部右侍郎尋轉左五年進尙
書後王邦奇承張璁桂萼以私隙上書汙故大學士楊廷
和等并誣宏宏竟致仕去時六年二月也十四年萼旣前
死璁亦去位帝始追念宏四月遣行人卽家起官如故七
月至京師使中使勞以上尊御饌面諭曰與卿別久卿康
健無恙宜悉心輔導稱朕意宏頓首謝自是眷遇益厚偕
李時召入無逸殿與周覽殿廬從容笑語移時始出賜銀
章曰舊輔元臣數有咨問宏亦竭誠無隱承璁萼操切之

氏姓譜

卷九

五末 費氏

七

後易以寬和朝士皆慕樂之未幾卒年六十有八帝嗟悼
賻卹加等贈太保諡文憲

費思居荆門人明季因避亂寓攸縣舉鄉試買一桃花巖
隱居著述有桃花巖詩文集

費懋文號望湖鉛山舉人性敏愷有能聲嘉靖中知臨武
縣甫下車觀聖廟圯壞命工修葺及諸祭器不典者悉易
以錫甚備又捐俸置田若干畝以贍士之不足者邑有學
田自茲始也檢飭諸政恤孤糶鋤強暴擒賊渠首民賴以
安每校士論文輒出家所藏書命士抄錄以廣所好邑人
咸戴之立生祠以崇報云

歷代列女

費氏以才貌事孟昶得幸賜號花蓋夫人幼能屬文尤長
于詩嘗作宮詞百首茲錄其八首云龍池九曲遠相通楊

柳綠牽兩岫風長似江南好風景畫船來去碧波中離宮
別院繞宮城金版輕敲合鳳笙夜夜月明花樹應傍池長
有按歌聲春風一面曉粧成偷折花枝傍水行却被內監
遙覩見故將紅豆打黃鸝侍女爭揮玉彈弓金丸飛入亂
花中一時驚起流鶯散踏破殘花滿地紅翠華香重玉爐
添雙鳳樓頭曉日暹扇掩紅鸞金殿悄一聲清暉捲珠簾
太液波清水殿涼畫船驚起宿鴛鴦翠眉不及池邊柳取
次飛花入建章春心滴破花邊漏曉夢敲回禁裡鐘十二
楚山何處是御樓曾見兩三峯蕙炷香銷燭影殘御衣薰
盡徹更闌歸來困頓眠紅帳一枕西風夢裡寒及宋平蜀
以俘見藝祖問其所作夫人奏詩云君王城上豎降旗妾
在深宮那得知十四萬人齊解甲寧無一箇是男兒蓋蜀
敗時精兵尙十四萬而王師纔三萬耳

氏姓譜

卷九

五末 費氏

七

費氏名元琇江陰知事朱道存妻也先是江陰亂元琇依
父居松江苗軍亂郡城元琇驚遽出卧內時苗手刃將入
犯之叱曰我夫君見勤王事汝輩奚敢犯我投釵珥于地
苗攫之去旣而苗沓至索貲無有欲驅迫就道元琇挈不
免乃攀堂楹厲聲曰苗狗敢辱我比遇害爪入楹木血沁
于指

費氏太學生沈坪妻也年二十一歸坪九月坪亡費截髮
毀容誓不易志舅憫之爲立嗣坐卧一小樓足不履地年
八十五卒後倭寇入掠指沈節婦門戒無相犯

費氏蒲圻人何槐孫妻夫病幾殆割股和藥有司旌表之
費氏江華人蔣堦妻適蔣三年而寡撫遺腹子復春家徒
壁立母令改適截髮自矢教子成立

魏氏

始祖畢公高封于畢爲畢氏杜預曰畢在長安西北今長安縣西有杜山又曰畢陌至畢萬事晉封于魏杜預曰魏在河東河北縣河北今爲平陸縣陝州治有魏城後雖遷徙不常自封魏後皆號魏惟徙梁之後亦謂之梁按畢公高周文王第十五子蓋庶子也故云姬姓之別族武王伐紂而高封于畢其後絕封爲庶人其苗裔曰畢萬卜事晉遇屯之比辛廖占之曰吉此公侯之卦獻公十六年趙夙爲御畢萬爲右以伐霍與耿魏三國而滅之以魏封畢萬爲大夫生魏犢從晉公子重耳出奔及重耳立以犢襲魏氏後治于魏武子之後世爲晉卿生悼子徙治霍今晉州霍邑是也生魏絳晉悼公曰自吾用魏絳八年之間九合諸侯和戎翟絳之力也賜之樂是爲莊子徙治安邑今爲縣隸解州自莊子七世

氏姓譜

卷九

五末

魏氏

三

武侯始稱侯受經于子夏過段干木之閭未嘗不式也其子武侯之十年與韓趙滅晉而分其地武侯之子稱王徙治大梁今開封治也是爲梁惠王自文侯而下二侯七王秦將王賁灌大梁城滅王假以其地爲郡縣子孫以國爲氏安釐王封其弟公子無忌爲信陵君其後蕃盛漢有高梁侯魏無知者信陵君之孫也又有甯陵君魏咎陳勝立爲魏王其弟魏豹項羽立爲魏王後乃魏之諸公子也

歷代名賢

同

魏犢是爲魏武子也初從文公出亡文公入卽位四年公蒐于被廬作三軍以犢爲右明年圍曹入之令無入僮負羈之宮而免其族報施也犢及顛頡怒曰勞之不圖報于何有燕僖負羈氏犢傷于冑公欲殺之而愛其材使問且

禍之病將殺之孽東自見使者曰以君之靈不有寧也距雖三百曲踊三百乃舍之殺顛頤以徇孽卒諡曰武子三鈞穎絳

魏錡犖之子食邑于呂謂之呂錡又曰厨武子事景公景公三年邲之役錡求公族未得而怒欲敗我師請致師弗許請使許之遂往請戰而還楚潘黨逐之及熒澤見六麋射一麋以顧獻曰子有軍事獸人無乃不給于鮮敢獻于從者潘黨去之會趙旃往楚子逐之遂乘我師我師敗績楚囚荀罃錡御荀首射連尹襄老與公子穀臣以歸景公薨事厲公厲公六年鄢陵之役錡夢射月中之退入于泥占之曰姬姓日也異姓月也必楚王也射而中之退入于泥亦必死矣及戰射共王中目王召養由基使射錡中項伏殺而死諡曰武

氏姓譜

卷九

五末

魏氏

十四

魏相錡子是爲呂宣子厲公三年公使相絕秦曰昔逮我獻公及穆公相好戮力同心申之以盟誓重之以婚姻天福晉國文公如齊惠公如秦無祿獻公卽世穆公不忘舊德俾我惠公用能奉祀于晉又不能成大勳而爲韓之師亦悔于厥心用集我文公是穆之成也文公躬擐甲胄跋履山川踰越險阻征東之諸侯虞夏商周之亂而朝諸秦則亦旣報舊德矣鄭人怒君之疆場我文公帥諸侯及秦圍鄭秦大夫不詢于我寡君擅及鄭盟諸侯疾之將致命于秦文公恐懼綏靜諸侯秦師克還無害則是我有大造于西也無祿文公卽世穆爲不弔蔑死我君寡我襄公迭我敝地奸絕我好伐我保城殄滅我費滑散離我兄弟撓亂我同盟傾覆我國家我襄公未忘君之舊勳而懼社稷之隕是以有殺之師猶願赦罪于穆公穆公弗聽而卽楚

謀我天誘其衷成王隕命穆公是以不克逞志于我穆襄
卽世康靈卽位康公我之自出又欲闕翦我公室傾覆我
社稷帥我螽賊以來蕩擗我邊疆我是以有合狐之役康
猶不悛入我河曲伐我涑川俘我王宮翦我羈馬我是以
有河曲之戰東道之不通則是康公絕我好也及君之嗣
也我君景公引領西望曰庶撫我乎君亦不惠稱盟利吾
有狄難入我河縣焚我箕郤芟夷我農功虔劉我邊垂我
是以有輔氏之聚君亦悔禍之延而欲徼福于先君獻穆
使伯車來命我景公曰吾與女同好棄惡復修舊德以追
念前勲言誓未就景公卽世我寡君是以有合狐之會君
又不祥背棄盟誓白狄及君同州君之仇讎而我之昏姻
也君來賜命曰吾與女伐狄寡君不敢顧昏姻畏君之威
而受命于夷君有二心于狄曰晉將伐女狄應且憎是用

氏姓譜

卷九

五未

魏氏

五

告我楚人惡君之二三其德也亦來告我曰秦背合狐之
盟而來求盟于我昭告昊天上帝秦三公楚三王曰余雖
與晉出入余唯利是視不穀惡其無成德是用宣之以懲
不一諸侯備聞此言斯是用痛心疾首睡就寡人寡人帥
以聽命唯好是求君若惠顧諸侯矜哀寡人而賜之盟則
寡人之願也其承寧諸侯以退豈敢徼亂君若不施大惠
寡人不佞其不能以諸侯退矣敢盡布之執事俾執事實
圖利之及悼公卽位使相佐下軍曰剌之役呂錡佐知莊
子于下軍獲楚公子穀臣與連尹襄老以免于羽郢之役
親射楚王而敗楚師以定晉國而無後其子孫不可不崇
也已而卒諡曰宣

魏顛孽之子也事景公景公六年我滅赤狄而秦伐我次
于輔氏公別遣顛距秦師公治兵于稷略狄土立黎侯而

還及雒頰敗秦師于輔氏獲杜回秦之力人也初魏犢有嬖妾無子犢疾命頰必嫁是疾病則曰必以爲殉及卒頰嫁之曰疾病則亂吾從其治也及輔氏之役頰見老人結草以亢杜回杜回躡而顛故獲之夜夢之曰余而所嫁婦人之父也爾用先人之治命余是以報頰子頰是爲合狐文子悼公卽位使頰佐新軍曰昔克潞之役秦來圖敗晉功魏頰以其身卻退秦師于輔氏親止杜回其勲盟于晉鐘至于今不育其子不可不興也頰卒諡曰文

魏絳犢之子莊子也悼公卽位知絳勇而不亂使爲司馬悼公三年公會諸侯同盟于雞澤公之弟揚干亂行于曲梁絳戮其僕公怒謂羊舌赤曰合諸侯以爲榮也揚干爲戮何辱如之必殺魏絳無失也對曰絳無二志事君不辟難有罪不逃刑其將來辭何辱命焉言終絳至授僕人書

氏姓譜

卷九

五末

魏氏

六

將伏劒士魴張老止之公讀其書曰日君乏使使臣斯司馬臣聞師衆以順爲武軍事有死無犯爲敬君合諸侯臣敢不敬君師不武執事不敬罪莫大焉臣懼其死以及揚干無所逃罪不能致訓至于用鉞臣之罪重敢有不從以怒君心請歸死于司寇公跣而出曰寡人之言親愛也吾子之計軍禮也寡人有弟弗能教訓使于大命寡人之過也子無重寡人之過敢以爲請公以絳爲能以刑佐民矣反役與之禮食使佐新軍四年無終子嘉父使孟樂來因絳納虎豹之皮以請和諸戎公曰戎狄無親而貪不如伐貳勞師于戎而楚伐陳必弗能救是棄陳也諸華必叛戎禽獸也獲戎失華無乃不可乎夏訓有之曰有窮后羿公曰后羿何如對曰昔有夏之方衰也后羿自鉏遷于窮石

因夏民以代夏政恃其射也不修民事而淫于原獸棄武羅伯因熊髡彫圍而用寒泥寒泥伯明氏之纜子弟也伯明后寒棄之夷羿收之信而使之以爲己相泯行媚于內而施賄于外愚弄其民而虞羿以田樹之詐愚以取其國家外內咸服羿猶不悅將歸自田家衆殺而享之以食其子其子不忍食請死于窮門靡奔有鬲氏泥因羿室生澆及豷恃其讒慝詐僞而不德于民使澆用師滅斟灌及斟尋氏處澆于過處豷于戈靡自有鬲氏收二國之燼以滅泥而立少康少康滅澆于過后杼滅豷于戈有窮由是遂亡失人故也昔周辛甲之爲大史也命百官箴王闕于虞人之箴曰芒芒禹跡畫爲九州經啟九道民有寢廟獸有茂草各有攸處德用不擾在帝夷羿冒于原獸忘其國恤而思其麀牡武不可重用不恤于夏家獸臣司原敢告

氏姓譜

卷九

五末

魏氏

七

僕夫虞箴如是可不懲乎于是公好田故絳及之公曰然則莫如和戎乎對曰和戎有五利焉戎狄薦居貴貨易土土可賈焉一也邊鄙不聳民狎其野穡人成功二也戎狄事晉四鄰振動諸侯威懷三也以德綏戎師徒不勤甲兵不頓四也鑒于后羿而用德度遠至邇安五也君其圖之公說使絳盟諸戎脩民事田以時九年公會諸侯伐鄭趙武及絳斬行栗師于汜鄭恐乃行成冬十一月同盟于戲而還十二月復伐之門其三門濟于陰阪次于陰口而還公歸謀所以息民絳請施舍輸積聚以貸自公以下苟有積者盡出之國無滯積亦無困人公無禁利亦無貪民所以幣更賔以特牲器用不作車服從給行之期年國乃有節三駕而楚不能與爭十年諸侯之師城虎牢而成之我師城梧及制士魴及絳戍之以信鄭鄭及我平十一年夏

四月諸侯伐鄭秋九月復伐鄭觀兵于鄭東門鄭成賂公以師惺師觸師蠲廣車軌車淳十五乘甲兵備凡兵車百乘歌鐘二肆及其鏜磬女樂二八公以樂之半賜絳曰子教寡人和諧戎狄以正諸華八年之中九合諸侯如樂之和無所不諧請與子樂之辭曰夫和戎狄國之福也八年之中九合諸侯諸侯無慝君之靈也二子之勞也臣何力之有焉抑臣願君安其樂而思其終也詩曰樂只君子殿天子之邦樂只君子福祿攸同便便左右亦是帥從夫樂以安德義以處之禮以行之信以守之仁以厲之而後可以殿邦國同福祿來遠人所謂樂也書曰居安思危思則有備有備無患敢以此規公曰子之教敢不承命抑微子寡人無以待戎不能濟河夫賞國之典也藏在盟府不可廢也子其受之絳于是始有金石之樂十三年士魴卒

氏姓譜

卷五

五末

魏氏

六八

使絳佐下軍明年伐秦公待于竟使六卿帥諸侯之師以進荀偃令曰鷄鳴而駕塞井夷竈唯余馬首是瞻樂廡曰晉國之命未有是也余馬首欲東乃歸下軍從之左史謂絳曰不待中行伯乎絳曰夫子命從帥樂伯吾帥也吾將從之從帥所以待夫子也平公時欒黶卒絳爲下軍帥廡子盈佐之平公二年公會諸侯圍齊絳及欒盈以下軍克邾我師焚其雍門及四郭東侵及濰南及沂絳卒諡曰莊子舒

魏舒

獻子也事平公初晉逐欒盈平公七年盈夜入曲沃

帥曲沃之甲以晝入絳盈初佐魏舒于下軍舒私焉故因

之士勾懼奉公以如固宮使子鞅逆舒則成列旣乘將逆

欒氏矣鞅趨進曰欒氏帥賊以入鞅之父與二三子在君

所矣使鞅逆吾子遂超乘命驅之士勾逆諸階執其手賂

之以曲沃遂殺盈滅欒氏衛孫林父遂其君獻公獻公出奔齊十年公使舒及宛沒逆衛獻公將使衛與之夷儀十七年荀吳伐無終及羣狄于太原崇卒也將戰舒曰彼徒我車所遇又阨以什共車必克困諸阨又克請皆卒自我始乃毀車以爲行伍乘爲三伍荀吳之嬖人不肯卽卒斬以徇爲五陳以相離兩于前伍于後專爲右角參爲左角偏爲前距以誘之翟人笑之未陳而薄之大敗之平公薨事昭公昭公薨事頃公頃公十二年韓起卒舒爲政分祁氏之田以爲七縣分羊舌氏之田以爲三縣司馬彌牟爲鄆大夫賈辛爲祁大夫司馬烏爲平陵大夫魏戊爲梗陽大夫知徐吾爲塗水大夫韓固爲馬首大夫孟丙爲孟大夫樂霄爲銅鞮大夫趙朝爲平陽大夫僚安爲楊氏大夫周子朝之亂賈辛司馬烏帥師納敬王至是舒謂其有力

氏姓譜

晉光

五未

魏氏

九

于王室故舉之謂知徐吾趙朝韓固魏戊餘子之不失職能守業者也其四人者皆受縣而後見于舒以賢舉也賈辛將適其縣見于舒舒曰辛來昔叔向適鄭饜蔑惡欲觀叔向從使之收器者而往立于堂下一言而善叔向將飲酒聞之曰必饜蔑也下執其手以上曰昔賈大夫惡娶妻而美三年不言不笑御以如舉射雉獲之其妻始笑而言賈大夫曰才之不可以已我不能射女遂不言不笑乎今子少不颺子若無言吾幾失子矣言之不可以已也如是遂如故知今女有力于王室吾是以舉女行乎敬之哉毋墮乃力仲尼聞舒之舉也以爲義曰近不失親遠不失舉可謂義矣又聞其命賈辛也以爲忠詩曰永言配命自求多福忠也魏子之舉也義其命也忠其長有後于晉國乎頃公薨事定公定公二年王使來請城成周舒及韓不信

如京師合諸侯之大夫于狄泉尋盟且令城成周明年歸
蒞政屬役于韓不信及原壽過而田于大陸焚焉還卒于
寧謚曰獻孫曼多嗣曼多卒謚曰襄子駒

魏冉秦昭王母宣太后弟也其先楚人姓芊氏秦武王卒
無子立其弟爲昭王昭王母故號爲芊八子及昭王卽位
芊八子號爲宣太后宣太后非武王母武王母號曰惠文
后先武王死宣太后二弟其異父長弟曰穰侯姓魏氏名
冉同父弟曰芊戎爲華陽君而昭王同母弟曰高陵君涇
陽君而魏冉最賢自惠王武王時任職用事武王卒諸弟
爭立唯魏冉力爲能立昭王昭王卽位以冉爲將軍衛威
陽誅季君之亂而逐武王后出之魏昭王諸兄弟不善者
皆滅之威振秦國昭王少宣太后自治任魏冉爲政昭王
七年穰里子死而使涇陽君質于齊趙人樓緩來相秦趙

氏姓譜

卷九

五本

魏氏

三

不利乃使仇液之秦請以魏冉爲秦相仇液將行其客宋
公謂液曰秦不聽公樓緩必怨公公不若謂樓緩曰請爲
公毋急秦秦王見趙請相魏冉之不急且不聽公公言而
事不成以德樓子事成魏冉故德公矣于是仇液從之而
秦果免樓緩而魏冉相秦欲誅呂禮禮出奔齊昭王十四
年魏冉舉白起使代向壽將而攻韓魏敗之伊闕斬首二
十四萬虜魏將公孫喜明年又取楚之宛葉魏冉謝病免
相以客卿壽燭爲相其明年燭免復相冉乃封魏冉千穰
復益封陶號曰穰侯穰封四歲爲秦將攻魏魏獻河東方
四百里拔魏之河內取城大小六十餘昭王十九年秦稱
西帝齊稱東帝月餘呂禮來而齊秦各復歸帝爲王魏冉
復相秦六歲而免免二歲復相秦四歲而使白起拔楚之
郢秦置南郡乃封白起爲武安君白起者穰侯之所任舉

也相善于是穰侯之富富于王室昭王三十二年穰侯爲相國將兵攻魏走芒卯入兆宅遂圍大梁梁大夫須賈說穰侯穰侯善之乃罷梁圍明年魏背秦與齊從親秦使穰侯伐魏斬首四萬走魏將暴鳶得魏二縣穰侯益封明年穰侯與白起客卿胡陽復攻趙韓魏破芒卯于華陽下斬首十萬取魏之卷蔡陽長社趙氏觀津且與趙觀津益趙以兵伐齊齊襄王懼使蘇代爲齊陰遺穰侯書曰臣聞往來者言曰秦兵蓋趙甲四萬以伐齊臣竊必之弊邑之王曰秦王明而熟于計穰侯智而習于事必不益趙甲四萬以伐齊是何也夫三晉之相與也秦之深讐也百相背也百相欺也不爲不信不爲無行今破齊以肥趙趙秦之深讐不利于秦此一也秦之謀者必曰破齊弊晉楚而後制晉楚之勝夫齊罷國也以天下攻齊如以千鈞之弩決潰

氏姓譜

卷九

五末

魏氏

三

雍也必死安能弊晉楚此二也秦少出兵則晉楚不信也多出兵則晉楚爲制于秦齊恐不走秦必走晉楚此三也秦割齊以啖晉楚晉楚案之以兵秦反受敵此四也是晉楚以秦謀齊以齊謀秦也何晉楚之智而秦齊之愚此五也故得安邑以善事之亦必無患矣秦有安邑韓氏必無上黨矣取天下之腸胃與出兵而懼其不反也孰利臣故曰秦王明而熟于計穰侯智而習于事必不益趙甲四萬以伐齊矣于是穰侯不行引兵而歸昭王三十六年相國穰侯言客卿竈欲伐齊取剛壽以廣其陶邑于是魏人范雎自謂張祿先生譏穰侯之伐齊乃越三晉以攻齊也以此時奸說秦昭王昭王于是用范雎范雎言宣太后專制穰侯擅權于諸侯涇陽君高陵君之屬太侈富于王室于是秦昭王悟乃免相國令涇陽之屬皆出關就封邑穰侯

出關轎車千乘有餘穰侯卒于陶而因葬焉秦收陶爲郡魏無忌魏昭王少子而魏安釐王異母弟也昭王薨安釐王卽位封公子爲信陵君是時范雎亡魏相秦以怨魏齊故秦兵圍大梁破魏華陽下軍走芒卯魏王及公子患之公子爲人仁而下士士無賢不肖皆謙而禮交之不敢以其富貴驕士士以此方數千里爭往歸之致食客三千人當是時諸侯以公子賢多客故不敢加兵謀魏十餘年公子與魏王博而北境傳舉烽言趙寇至且入界魏王釋博欲召大臣謀公子止王曰趙王田獵耳非爲寇也復博如故王恐心不在博居頃復從北方來傳言曰趙王獵耳非爲寇也魏王大驚曰公子何以知之公子曰臣之客有能探得趙王陰事者趙王所爲客輒以報臣臣以此知之是後魏王畏公子之賢能不敢任公子以國政魏有隱士曰

氏姓譜

卷五九

五未

魏氏

三

侯羸年七十家貧爲大梁夷門監者公子聞之往請欲厚遺之不肯受曰臣修身絜行數十年終不以監門困而受公子財公子于是乃置酒大會賓客坐定公子從車騎虛左自迎夷門侯生侯生攝弊衣冠直上載公子上坐不讓欲以觀公子公子執轡愈恭侯生又謂公子曰臣有客在市屠中願枉車騎過之公子引車入市侯生下見其客朱亥睥睨故久立與其容語微察公子公子顏色愈和當是時魏將相宗室賓客滿堂待公子舉酒市人皆觀公子執轡從騎皆竊罵侯生侯生視公子色終不變乃謝客就車至家公子引侯生坐上坐徧贊賓客賓客皆驚酒酣公子起爲壽侯生前侯生因謂公子曰今日羸之爲公子亦足矣羸乃夷門抱關者也而公子親往車騎自迎羸于衆人廣坐之中不宜有所過今公子故過之然羸欲就公子之

名故久立公子車騎市中過客以觀公子公子愈恭市人皆以羸爲小人而以公子爲長者能下士也于是罷酒侯生遂爲上客侯生謂公子曰臣所過屠者朱亥此子賢者世莫能知故隱屠間耳公子往數請之朱亥故不復謝公子怪之魏安釐王二十年秦昭王已破趙長平軍又進兵圍邯鄲公子姊爲趙惠王弟平原君夫人數遺魏王及公子書請救于魏魏王使將軍晉鄙將十萬衆救趙秦王使者告魏王曰吾攻趙且暮且下而諸侯敢救者已拔趙必移兵先擊之魏王恐使人止晉鄙留軍壁鄴名爲救趙實持兩端以觀望平原君使者冠蓋相屬于魏讓魏公子曰勝所以自附爲婚姻者以公子之高義爲能急人之困今邯鄲且暮降秦而魏救不至安在公子能急人之困也且公子縱輕勝棄之降秦獨不憐公子姊邪公子患之數

氏姓譜

卷五九

五末

魏氏

三

請魏王及賓客辨士說王萬端魏王畏秦終不聽公子公子自度終不能得之于王計不獨生而令趙亡乃請賓客約車騎百餘乘欲以客往赴秦軍與趙俱死行過夷門見侯生具告所以欲死秦軍狀辭決而行侯生曰公子勉之矣老臣不能從公子行數里心不快曰吾所以待侯生者備矣天下莫不聞今吾且死而侯生曾無一言半辭送我我豈有所失哉復引車還問侯生侯生笑曰臣固知公子之還也曰公子喜士名聞天下今有難無他端而欲赴秦軍譬若以肉投餒虎何功之有哉尙安事客然公子遇臣厚公子往而臣不送以是知公子恨之復返也公子再拜因問侯生乃屏人間語曰羸聞晉鄙之兵符常在王卧內而如姬最幸出入王卧內力能竊之羸聞如姬父爲人所殺如姬資之三年自王以下欲求報其父仇莫能得如姬

爲公子泣公子使客斬其仇頭敬進如姬如姬之欲爲公子死無所辭顧未有路耳公子誠一開口請如姬如姬必許諾則得虎符奪晉鄙軍北救趙而西却秦此五霸之伐也公子從其計請如姬如姬果盜晉鄙兵符與公子公行侯生曰將在外主令有所不受以便國家公子卽合符而晉鄙不授公子兵而復請之事必危矣臣客屠者朱亥可與俱此人力士晉鄙聽大善不聽可使擊之于是公子泣侯生曰公子畏死耶何泣也公子曰晉鄙嘖嗜宿將往恐不聽必當殺之是以泣耳豈畏死哉于是公子請朱亥朱亥笑曰臣乃市井鼓刀屠者而公子親數存之所以不報謝者以爲小禮無所用今公子有急此乃臣效命之秋也送與公子俱公子過謝侯生侯生曰臣宜從老不能請數公子行日以至晉鄙軍之曰北鄉自剄以送公子公子

氏姓譜

卷九

五末

魏氏

二

遂行至鄴矯魏王令代晉鄙晉鄙合符疑之舉手視公子曰今吾擁十萬之衆屯于境上國之重任今單車來代之何如哉欲無聽朱亥袖四十斤鐵錐錐殺晉鄙公子遂將晉鄙軍勒兵下令軍中曰父子俱在軍中父歸兄弟俱在軍中兄歸獨子無兄弟歸養得選兵八萬人進兵擊秦軍秦軍解去遂救邯鄲存趙趙王及平原君自迎公子于界平原君負韉矢爲公子先引趙王再拜曰自古賢人未有及公子者也當此之時平原君不敢自比于人公子與侯生決至軍侯生果北鄉自頸魏王怒公子之盜其兵符矯殺晉鄙公子亦自知也已却秦存趙使將將其軍歸魏公子獨與客留趙趙孝成王德公子之矯奪晉鄙軍而存趙乃與平原君計以五城封公子公子聞之意驕矜而有自功之色客有說公子曰物有不可忘或有不可不忘夫人

有德于公子公子不可忘也公子有德于人願公子忘之也且矯魏王令奪晉鄙兵以救趙于趙則有功矣于魏則未爲忠臣也公子乃自驕而功之竊爲公子不取也于是公子立自責似若無所容者趙王掃除自迎執主人之禮引公子就西階公子側行辭讓從東階上自言鼻過以負于魏無功于趙趙王侍酒至暮口不忍獻五城以公子退讓也公子竟留趙趙王以鄙爲公子湯沐邑魏亦復以信陵奉公子公子聞趙有處士毛公藏于博徒薛公藏于賣漿家公子欲見兩人兩人自匿不肯見公子公子聞所在乃閒步往從此兩人游甚歡平原君聞之謂其夫人曰始吾聞夫人弟公子天下無雙今吾聞之乃妄從博徒賣漿者游公子妄人耳夫人以告公子公子乃謝夫人去曰始吾聞平原君賢故負魏王而救趙以稱平原君平原君之

氏姓譜

卷五

五末

魏氏

二五

游徒豪舉耳不求士也無忌自在大梁時常聞此兩人賢至趙恐不得見以無忌從之游尙恐其不我欲也今平原君乃以爲羞其不足從游乃裝爲去夫人具以語平原君平原君乃免冠謝固留公子平原君門下聞之半去平原君歸公子天下士復往歸公子公子傾平原君客公子留趙十年不歸秦王聞公子在趙日夜出兵東伐魏魏王患之使使往請公子公子恐其怒之乃誡門下有敢爲魏王使通者死賓客皆背魏之趙莫敢勸公子歸毛公薛公兩人往見公子曰公子所以重于趙名聞諸侯者徒以有魏也今秦攻魏魏急而公子不恤使秦破大梁而夷先王之宗廟公子當何面目立天下乎語未及卒公子立變色告車趣駕歸救魏魏王見公子相與泣而上將軍印授公子公子遂將魏安釐王三十年公子使使遍告諸侯諸侯

聞公子將各遣將將兵救魏公子率五國之兵破秦軍于河外走蒙驁遂乘勝逐秦軍至函谷關抑秦兵秦兵不敢出當是時公子威振天下諸侯之客進兵法公子皆名之故世俗稱魏公子兵法秦王患之乃行金萬斤于魏求晉鄙客合毀公子于魏王曰公子亡在外十年矣今爲魏將諸侯將皆屬諸侯徒聞魏公子不聞魏王公子亦欲因此時定南面而王諸侯畏公子之威方欲共立之秦數使反間僞賀公子得立爲魏王未也魏王日聞其毀不能不信後果使人代公子將公子自知再以毀廢乃謝病不朝與賓客爲長夜飲飲醇酒多近婦女日夜爲樂飲者四歲竟病酒而卒其歲魏安釐王亦薨秦聞公子死使蒙驁攻魏拔二十城初置東郡其後秦稍蠶食魏十八歲而虜魏王屠大梁兵形勢魏公子二十一篇圖十卷

氏姓譜

卷五九

五末

魏氏

二六

漢

魏相字弱翁濟陰定陶人也徙平陵少學易爲郡卒史舉賢良以對策高第爲茂陵令頃之御史大夫桑宏羊客許稱御史止傳丞不以時謁客怒縛丞相疑其有姦收捕案致其罪論棄客市茂陵大治後遷河南太守禁止姦邪豪彊畏服會丞相車千秋死先是千秋子爲雒陽武庫令自見失父而相治郡嚴恐久獲罪迺自免去相使掾追呼之遂不肯還相獨恨曰大將軍聞此令去官必以爲我用丞相死不能遇其子使當世貴人非我殆矣武庫令西至長安大將軍霍光果以責過相曰幼主新立以爲函谷京師之固武庫精兵所聚故以丞相弟爲闕都尉子爲武庫令今河南太守不深惟國家大策苟見丞相不在而斥逐其子何淺薄也後人有告相賊殺不辜事下有司河南卒成

中都官者二三千人遮大將軍自言願復留作一年以贖
太守罪河南老弱萬餘人守關欲入上書關吏以聞大將
軍用武庫令事遂下相廷尉獄久繫踰冬會赦出復有詔
守茂陵令遷楊州刺史考案郡國守相多所貶退相與丙
吉相善時吉爲光祿大夫與相書曰朝廷已深知弱翁行
治方且大用矣願少慎事自重藏器于身相心善其言爲
霽威嚴居部二歲徵爲諫議大夫復爲河南太守數年宣
帝卽位徵相入爲大司農遷御史大夫四歲大將軍霍光
薨上思其功德以及于禹爲右將軍兄子樂平侯山復領
尙書事相因平恩侯許伯奏封事帝善之詔相給事中皆
從其議霍氏殺許后之謀始得上聞迺罷其三侯令就第
親屬皆出補吏于是韋賢以老病免相遂代爲丞相封高
平侯食邑八百戶及霍氏怨相又彈之謀矯太后詔先召

氏姓譜

卷九

五本

魏氏

三

斬丞相然後廢天子事發覺伏誅宣帝始親萬機厲精爲
治練羣臣核名實而相總領衆職甚稱上意元康中匈奴
遣兵擊漢屯田車師者不能下上與後將軍趙充國等議
欲因匈奴衰弱出兵擊其右地使不敢復擾西域相上書
上從其言而止相明易經有師法好觀漢故事及便宜章
奏以爲古今異制方今務在奉行故事而已數條漢興已
來國家便宜行事及賢臣賈誼鼂錯董仲舒等所言奏請
施行之時丙吉爲御史大夫同心輔政上皆重之相爲人
嚴毅不如吉寬視事九歲神爵三年薨諡曰憲侯子宏嗣
甘露中有罪削爵爲關內侯

魏霸字喬卿濟陰句陽人也世有禮義霸少喪親兄弟同
居州里慕其雍和建初中舉孝廉入遷和帝時爲鉅鹿太
守以簡朴寬恕爲政掾史有過要先誨其失不改者乃置

之吏或相毀訴霸輒稱它吏之長終不及人短言者懷慙
譖訟遂息永元十六年徵拜將作大匠明年和帝崩典作
順陵時盛冬地凍中使督促數罰縣吏以厲霸霸撫循而
已初不切責而反勞之曰今諸卿被辱大匠過也吏皆懷
恩力作倍功延平元年代尹勤爲太常明年以病致仕爲
光祿大夫永初五年拜長樂衛尉以病乞身復爲光祿大
夫卒于官

魏朗字少英會稽上虞人也少爲縣吏兄爲鄉人所殺朗
白日操刃報讐于縣中遂亡命到陳國從博士郤仲信學
春秋圖緯又詣太學授五經京師長者李膺之徒爭從之
初辟司徒府再遷彭城令時中官子弟爲相國多行非法
朗與更相章奏幸臣忿疾欲中之會九真賊起乃共薦朗
爲九真都尉到官獎厲吏兵討破羣賊斬首三千級桓帝

氏姓譜

卷九

五末

魏氏

二八

美其功徵拜議郎頃之遷尚書屢陳便宜有所補益出爲
河內太守政稱三河表尚書令陳蕃薦朗公忠亮直宜在
機密復徵爲尚書會被黨議免歸家朗性矜嚴閉門整法
度家人不見墮容後竇武等誅朗以黨被急徵行至牛渚
自殺著書數篇號魏子云

魏應字君伯任城人也少好學建武初詣博士受業習魯
詩閉門誦習不交僚黨京師稱之後歸爲郡吏舉明經除
濟陰王文學以疾免官教授山澤中徒衆常數百人永平
初爲博士再遷侍中十三年遷大鴻臚建初四年拜五官
中郎將詔入授千乘王伉應經明行修弟子自遠方至著
錄數千人肅宗甚重之數進見論難于前特受賞賜時會
京師諸儒于白虎觀講論五經同異使應專掌難問侍中
淳于恭奏之帝親臨稱制如石渠故事明年出爲上黨太

守徵拜騎都尉卒于官

魏桓安陽人以清節數被鄉人勸之應聘桓曰夫干祿求進所以行志也今後宮百數其可損乎廐馬十匹其可減乎左右權豪其可去乎皆對曰不可桓乃歎曰使桓生行死歸于世何有哉遂隱身不出

魏譚琅邪人少時亦爲飢寇所獲數十人皆束縛以次當烹賊見譚似謹厚獨令主爨暮輒就縛賊有夷長公特哀念譚密解其縛語曰汝曹皆應就食急從此去對曰譚爲諸君爨恒得遺餘餘人皆如草菜不如食我長公義之並赦遣得俱免譚永平中爲主家令

魏舒字陽元任城樊人也少孤爲外家寧氏所養寧氏起宅相宅者云當出貴甥外祖母以魏氏甥小而慧意謂應

氏姓譜

卷九

五末

魏氏

元

之舒曰當爲外氏成此宅相久乃別居身長八尺二寸姿望秀偉飲酒石餘而遲鈍質朴不爲鄉親所重從叔父吏部郎衡有名當世亦不之知使守水碓每歎曰舒堪數百戶長我願畢矣舒亦不以介意不修常人之節不爲皎厲之事每欲容才長物終不顯人之短性好騎射著韋衣入山澤以漁獵爲事唯太原王又謂舒曰卿終當爲台輔然今未能令妻子免飢寒吾當助卿營之常振其匱乏舒受而不辭舒嘗詣野王主人妻夜產俄而聞車馬之聲相問曰男也女也曰男書之十五以兵死復問寢者爲誰曰魏公舒後十五載詣主人問所生兒何在曰因條桑爲斧傷而死舒自知當爲公矣年四十餘郡上計掾察孝廉宗黨以舒無學業勸令不就可以爲高耳舒曰若試而不中其負在我安可虛竊不就之高以爲已榮乎于是自課百

習一經因而對策升第除灑池長遷浚儀令人爲尚書郎時欲沙汰郎官非其才者罷之舒曰吾卽其人也襍被而出同寮素無清論者咸有愧色談者稱之累遷後將軍鍾毓長史毓每與參佐射舒常爲畫籌而已後遇朋人不足以舒滿數毓初不知其善射舒容範閑雅發無不中舉坐愕然莫有敵者毓謝而歎曰吾之不足以盡卿才有如此射矣豈一事哉轉相國參軍封劇陽子府朝碎務未嘗見是非至于廢興大事衆人莫能斷者舒徐爲籌之多出衆議之表文帝深器重之每朝會坐罷目送之曰魏舒堂堂人之領袖也遷宜陽滎陽二郡太守甚有聲稱徵拜散騎常侍出爲冀州刺史在州三年以簡惠稱入爲侍中武帝以舒清素特賜絹百匹遷尚書以公事當免官詔以贖論舒三娶妻皆亡是歲自表乞假還本郡塋妻詔賜塋地一

氏姓譜

卷九

五末

魏氏

三

頃錢五十萬太康初拜右僕射舒與衛瓘山濤張華等以六合混一宜用右典封禪東嶽前後累陳其事帝謙讓不許以舒爲左僕射領吏部上言今遷六宮娉以玉帛而舊使御府丞奉聘宣成嘉禮贄重使輕以爲拜三夫人宜使卿九嬪使五官中郎將美人良人使謁者于典制爲宏有詔詳之衆議異同遂寢加右光祿大夫儀同三司及山濤薨以舒領司徒有頃卽真舒有威重德望祿散之九族家無餘財陳留周震累爲諸府所辟辟書旣下公輒喪亡僉號震爲殺公掾莫有辟者舒乃命之而竟無患識者以此稱其達命以年老每稱疾遜位中復暫起署兗州中正尋又稱疾後以災異遜位帝不聽後因正旦朝罷還第表送章綬帝手詔敦勉而舒執意彌固乃下詔賜安車駟馬門施行馬舒爲事必先行而後言遜位之際莫有知者時論

以爲晉興以來三公能辭榮祿終者未之有也太熙元年
薨時年八十二帝甚傷悼賜賻優厚諡曰康子混字延廣
清惠有才行爲太子舍人年二十七先舒卒朝野咸爲舒
悲惜舒每哀慟退而歎曰吾不及莊生遠矣豈以無益自
損乎于是終服不復哭以庶孫融嗣又早卒從孫晃嗣

魏詠之字長道任城人也家世貧素而躬耕爲事好學不
倦生而免缺有善相者謂之曰卿當富貴年十八聞荊州
刺史殷仲堪帳下有名醫能療之貧無行裝謂家人曰殘
醜如此用活何爲遂齋數斛米西上以投仲堪旣至造門
自通仲堪與語嘉其盛意召醫視之醫曰可割而補之但
須百日進粥不得笑語詠之曰半生不語而有半生亦當
療之况百日邪仲堪于是處之別屋令醫善療之詠之遂
閉口不語唯食薄粥其厲志如此及差仲堪厚資遣之初

氏姓譜

卷九

五末

魏氏

三

爲州主簿嘗見桓元旣出元鄙其精神不雋謂坐客曰庸
神而宅偉幹不成令器竟不調而遣之詠之早與劉裕游
歎及元篡位協贊義謀元敗授建威將軍豫州刺史桓歆
寇歷陽詠之率衆擊走之義熙初進征虜將軍吳國內史
尋轉荊州刺史持節都督六州領南蠻校尉詠之初在布
衣不以貧賤爲恥及居顯位亦不以富貴驕人始爲仲堪
之客未幾竟其位論者稱之尋卒于官詔贈太常加散
騎常侍其後錄其贊義之功追封江陵縣公食邑二千五
百戶諡曰桓弟順之至琅邪內史

南北

魏蘭根鉅鹿下曲陽人也父伯成魏太山太守蘭根身長
八尺儀貌奇偉汎覽羣書誦左氏傳周易機警有識悟起
家北海王國侍郎母憂居喪有孝稱將塋常山郡境先有

董卓祠祠有栢樹蘭根以卓凶逆不應遺祠至今乃啟刺
更請伐栢爲槲傍人皆言有靈蘭根了無疑懼遭父喪廬
于墓側負土成墳憂毀殆于滅性正光末尙書令李崇爲
大都督討蠕蠕以蘭根爲長史因說崇曰緣邊諸鎮空攝
長遠昔時初置地廣人稀或徵發中原強宗子弟或國之
肺腑寄以爪牙中年以來有司乖實號曰府戶役同廝養
官婚班齒致失清流而本宗舊類各各榮顯顧瞻彼此理
當憤怨宜改鎮立州分置郡縣凡是府戶悉免爲民入仕
次叙一準其舊此計若行國家庶無北顧之憂崇以奏聞
事寢不報孝昌初轉岐州刺史從行臺蕭寶寅討破宛州
俘其民人爲奴婢以美女十人賞蘭根蘭根辭曰此縣界
于強虜故成背叛今當恤其飢寒奈何並充僕隸于是盡
以歸其父兄部內麥多五穗隣州田鼠爲災犬牙不入岐

氏姓譜

卷五九

五末

魏氏

三

境及蕭寶寅敗于涇州高平虜賊逼岐州州城民逼囚蘭
根降賊寶寅兵威復振城民復斬賊刺史侯莫陳仲和推
蘭根復任朝廷以蘭根得西土人心加都督涇州東秦南
岐四州諸軍事兼四州行臺尙書孝昌末河北流人南渡
以蘭根兼尙書使齊濟二兗四州安撫并置郡縣蘭根甥
邢杲反于青兗間復詔蘭根慰勞杲不下仍隨元天穆討
之還拜中書令莊帝之將誅爾朱榮蘭根聞其計遂密告
爾朱世隆榮死蘭根恐莊帝知之憂懼不知所出時慮詔
王道習見信于莊帝蘭根乃託附之求得在外立功乃兼
尙書右僕射河北行臺定州率募鄉曲欲防并陘爲榮將
侯深所敗走依勃海高乾屬乾兄弟舉義因在中山高祖
以蘭根宿望深禮遇之中興初爲尙書右僕射及高祖將
入洛陽時廢立未決令蘭根觀察魏後廢帝帝神采高明

前根恐于後難測遂與高乾兄弟及黃門侍郎崔毅同心
固請于高祖不得已遂立武帝太昌初加侍中開府儀同
三司封鉅鹿縣侯啟授兄子周達蘭根既預勲業位居端
揆至是始叙復岐州勲封永興縣侯高乾之死蘭根懼以
病免天平初言病篤以開府儀同歸本鄉門施行馬武定
三年卒時年六十一贈司徒公諡曰文宣

魏道生鉅鹿人幼從竺法汰出家年在志學便登講座初
依廬山後與僧叡慧嚴慧觀等從羅什受業闕中乃立善
不受報及頓悟成佛義又著二諦論佛性常有論佛無淨
土論應有緣論又以法顯三藏所翻泥洹經先至經云除
一闍提皆有佛性謂是經來未盡耳乃唱闍提之人皆得
成佛僧黨以爲背經遂擯而遣之師正容誓曰若所說背
經當見身厲疾若與實相不肯願舍壽之曰據獅子座及

氏姓譜

卷九

五末

魏氏

三

後大經至諸師皆媿服被擯入虎邱山聚石爲徒講涅槃
經石皆爲點頭旬日學衆雲集師于寺請齋賓律師譯沙
彌塞律傳于世復投廬山預蓮社久之還都止青霞寺時
王宏范泰顏延之相從問道元嘉十一年于廬山升座說
法將畢衆見塵尾紛然墜地隱几而化宛若入定諸師聞
之益信前誓有證翌日葬于廬山西阜

魏寧鉅鹿人以善推祿命徵爲館客武成親試之皆中乃
以已生年月託爲異人而問之寧曰極富貴今年入墓武
成驚曰是我寧變辭曰若帝王自有法又有陽子術語人
曰譚言盧十六稚十四隄子拍頭三十二且四八天之太
數太上之祚恐不過此旣而武成崩年三十二也

魏元亨僧智其先任城人也六世祖休仕晉爲魯郡守永
嘉南遷遂居江左父承祖魏景明中自梁歸魏家于新安

元少慷慨有膽畧孝武西遷東魏北徙人情騷動各懷去就元遂率鄉兵抗拒東魏邙山之役大軍不利宜陽洛州皆爲東魏守而元母及弟竝在宜陽元以爲忠孝不兩立乃率義徒還關南鎮撫周文手書勞之除洛陽令封廣宗縣子周保定元年累遷驃騎大將軍開府儀同三司徙鎮閩韓遷熊州刺史政存簡惠百姓悅之轉和州刺史伏流防主進爵爲公及齊將斛律明月率衆向宜陽兵威甚盛元率兵禦之每戰輒克後以疾卒于位

魏承祖廣陵寒人也依隨裴叔業爲趨走左右壯健善事人叔業待之甚厚及出爲州以爲防閭善撫士卒兼有將用自景明以後常爲統軍南北征伐累有戰功歷太原太守至光祿大夫安南將軍蕭衍遣將圍義陽士民應之三關旣陷州城時甚縣急以承祖持節行撫軍將軍率師討

氏姓譜

卷九

五末

魏氏

三

之大破賊衆解義陽之圍還復三關遂爲名將終於并州刺史

魏長賢收之族叔也祖釗本名顯義字宏理魏世祖賜名仍命以顯義爲字雅性俊辯博涉羣書有當世才兼資文武知名梁楚淮泗之間世祖南伐聞而召之旣至與語大悅謂釗曰今我此行是卿建功之日勉之勿憂不富貴也授內都直侍左右師次淮南諸城未有下者釗乃進曰陛下百萬之軍風行電掃攻城畧地所向無前雖有智者莫能爲計然而師次淮南已經累日義陽諸城猶敢拒守此非不懼亡滅自謂必可保全也但陛下卒徒果銳殺掠尚多人皆畏威未甚懷惠恐一旦降下妻子不全所以遲疑未肯先發臣請間入城內見其豪右宣達聖心示以誠信必當大小相率面縛請罪陛下拔其英楚因而任之此外

諸城可不勞兵而自定世祖大喜曰所以召卿本爲是耳
卿今所言副吾所望劍遂夜入城中示以危亡之期開以
生全之路城中大小欣悅明旦開門出降自此而南望塵
欸附世祖謂劍曰卿之一言踰于十萬之衆揚我信義播
于四表實卿一人之力卽授義陽太守陵江將軍又合劍
與諸將統兵討襲所當無不摧破軍中服其勇敢世祖益
喜謂羣臣曰中國士人吾拔擢咸盡文武臆畧未有若劍
儔加授建忠將軍追贈其父處順州刺史時經畧江左方
未用之遇風疾發動頻降醫藥竟不痊復卒時年六十四
父彥字惠卿博學善屬文趙郡王幹辟開府參軍廣陵王
辟記室並不行陳留公李崇甚重之引爲鎮西參軍事崇
討叛氏陽靈珍叛蠻魯北鸞又請爲記室參軍軍還求爲
著作卽思樹不朽之業以晉書作者多家體制繁雜欲正

氏姓譜

卷九

五末

魏氏

三

其紕繆剛其游辭勒成一家之典俄而彭城王聞李崇稱
之復請爲掾兼知主客卽中書遂不成王遇害退歸田里
清河王復引爲諮議王勢高名重深爲權倖所疾恐罹其
禍固辭以疾肅宗初拜驃騎長史尋轉光州刺史年六十
八卒兄伯胤之歸也留長賢與弟德振使宦學于洛中孝
靜北遷亦徙居鄴博涉經史詞藻清華舉秀才除汝南王
悅參軍事入齊平陽王淹辟爲法曹參軍轉著作佐卽更
撰晉書欲還成先志河清中上書譏刺時政大忤權倖爲
上黨屯留令親故以長賢不相時而動或爲書以相規責
是出也人皆爲之怏怏而長賢處之怡然不屑懷抱識者
以此多焉武平中辭疾去職終于齊代不復出仕周武平
齊搜揚才俊辟書屢降固以疾辭卒年七十四貞觀中贈

定州刺史子徵

魏季景收族叔也父鸞字雙和爲魏文賜各有器幹體貌魁偉以有容儀爲奉車都尉曾升輅車觸毀金翼歛容請罪帝笑曰卿體貌過人素不便習何足懼也車駕南征漢陽除鸞統軍帝歷幸其營歎賞之及在馬圈不豫敕兼武衛將軍領宿衛左右景明中六輔之廢鸞頗預其事後除光州刺史更滿還朝卒諡曰夷子季景少孤清苦自立博學有文才弱冠有名京師時刑子明稱有才學始與子才相侔季景與收相亞洛中號兩邢二魏莊帝時爲中書侍郎普泰中爲尚書右丞季景善附會宰要當朝必先事其左右余朱世隆特賞愛之于時才名甚盛頗過其實太昌中位給事黃門侍郎甚見信待除定州大中正孝武帝釋奠季景與溫子昇李業興寶瑗等俱爲謫句天平初因遷都遂居栢人西山內懷憂悔乃爲擇居賦元象初兼給事

氏姓譜

卷九

五末

魏氏

三

黃門侍郎後兼散騎常侍使梁還歷大司農卿魏郡尹卒家無餘財遺命薄塋贈散騎常侍衛尉卿所著文筆二百餘篇于澹知名

信

魏澹字彥深年十五而孤專精好學高才善屬文仕齊殿中侍御史預修五禮及撰御覽除殿中郎中書舍人與李德林修國史入周爲納言中士隋初爲行臺禮部侍郎尋爲聘陳使主還除太子舍人廢太子勇深禮之令注庚信集撰笑苑世稱博物遷著作郎仍爲太子學士帝以魏收所撰後魏書褒貶失實平繪爲中興書事不倫序詔澹別成魏史書成上覽而善之未幾而卒有集三十卷子罕言澹弟彥元位涪州司馬子滿行

魏德深本鉅鹿人也祖冲仕周爲刑部大夫建州刺史因

家宏農父毗鬱林令德深初爲隋文帝挽卽後歷馮翊郡書佐武陽郡司戶書佐以能遷貴鄉長爲政清靜不嚴而肅會興遼東之役徵稅百端使人往來責成郡縣于時王綱弛紊吏多賂賄所在徵斂人不堪命唯德深一縣有無相通不竭其力所求皆給而百姓不擾于時盜賊羣起武陽諸城多被淪陷唯貴鄉獨全郡丞元寶藏受詔逐捕盜賊每戰不利則器械必盡輒徵發于人動以軍法從事如此者數矣其隣城營造皆聚于聽事吏人遞相督責晝夜喧囂猶不能濟德深各問其所欲任隨便修營官府寂然恒若無事唯約束長吏所修不須過勝餘縣使百姓勞苦然在下各自竭心常爲諸縣之最尋轉館陶長貴鄉吏人聞之相與言及其事皆獻欷流涕語不成聲及將赴任傾城送之號泣之聲道路不絕旣至館陶闔境老幼皆如見

氏姓譜

卷九

五末

魏氏

三七

其父母有猾人員外郎趙君實與郡丞元寶藏深相交結前後令長未有不受其指麾者自德深至縣君實屏處于室未嘗輒敢出門逃竄之徒歸來如市貴鄉父老昌涉艱險詣闕請留德深有詔許之館陶父老復詣郡相訟以貴鄉文書爲詐郡不能決會持節使者韋霽杜整等至兩縣詣使訟之乃斷從貴鄉貴鄉吏人歌呼滿道互相稱慶館陶衆庶合境悲泣因從而居住者數百家寶藏深害其能會越王侗徵兵于郡寶藏遂令德深率兵千人赴東都俄而寶藏以武陽歸李密德深所領皆武陽人也以本土從賊念其親戚輒出都門東向慟哭而反人或謂之曰李密兵馬近在金墉去此二十餘里汝今必欲歸誰能相禁何爲自苦如此其人皆垂泣曰我與魏明府同來不忍棄去豈以道路艱難乎其得人心如此後與賊戰没于陣貴鄉

能陶人庶至今懷之

唐

魏徵字元成魏州曲城人少孤落魄棄貫產不營有大志通貫書術隋亂詭爲道士武陽郡丞元寶藏舉兵應李密以徵典書檄密得寶藏書軌稱善旣聞徵所爲促召之徵進十策說密不能用王世充攻洛口徵見長史鄭頴曰魏公雖驟勝而驍將銳士死傷略盡又府無見財戰勝不賞此二者不可以戰若浚池峭壘曠日持久賊糧盡且去我追擊之取勝之道也頴曰老儒常語耳徵不謝去後從密來京師久之未知名自請安輯山東乃擢秘書丞馳驅至黎陽時李勣尙爲密守徵與書曰始魏公起叛徒振臂大呼衆數十萬威之所被半天下然而一敗不振卒歸唐者固知天命有所歸也今君處必爭之地不早自圖則大事

氏姓譜

卷九

五末

魏氏

三

去矣勣得書遂定計歸而大發粟饋淮安王之軍會竇建德陷黎陽獲徵僞拜起居舍人建德敗與裴矩走入關隱太子引爲洗馬徵見秦王功高陰勸太子早爲計太子敗王責謂曰爾鬪吾兄弟奈何答曰太子蚤從徵言不死今日之禍王器其直無恨意卽位拜諫議大夫封鉅鹿縣男當時河北州縣素事隱巢者不自安往往曹伏思亂徵白太宗曰不示至公禍不可解帝曰爾行安喻河北道遇太子于牛牛李志安齊王護軍李思行傳送京師徵與其副謀曰屬有詔宮府舊人普原之今復執送志安等誰不自疑者吾屬雖往人不信卽貸而後聞使還帝悅日益親或引至卧內訪天下事徵亦自以不世遇乃展盡底蘊無所隱凡二百餘奏無不剴切當帝心者由是拜尙書右丞兼諫議大夫左右有毀徵阿黨親戚者帝使温彦博按訊非是

彥博曰徵爲人臣不能著形迹遠嫌疑而被飛謗是宜責也帝謂彥博行讓徵徵見帝謝曰臣聞君臣同心是謂一體豈有置至公事形迹若上下共由茲路邦之興喪未可知也帝矍然曰吾悟之矣徵頓首曰願陛下俾臣爲良臣毋俾臣爲忠臣帝曰忠良異乎曰良臣稷契咎陶也忠臣龍逢比干也良臣身荷美名君都顯號于孫傳承流祚無疆忠臣躬嬰禍誅君陷昏惡喪國夷家祗取空名此其異也帝曰善因問爲君者何道而明何失而暗徵曰君所以明兼聽也所以暗偏信也鄭仁基息女美而才皇后建請爲充華典冊具或言許聘矣徵諫曰鄭已約昏陛下取之豈爲人父母意帝痛自咎削詔停冊貞觀三年以祕書監參豫朝政高昌王麴文泰將入朝西域諸國欲因文泰悉遣使者奉獻帝詔文泰使人馱恒乾干迎之徵曰異時文

氏姓譜

卷九

五末

魏氏

元

秦入朝所過供擬不能其今又加諸國焉則瀕塞州縣以乏致罪者衆彼以商賈來則邊人爲之利若賓客之中國蕭然耗矣漢建武時西域請置都護送侍子光武不許不以蠻夷弊中國也帝曰善追止其詔于是帝卽位四年歲斷死二十九幾至刑措米斗三錢先是帝嘗嘆曰今大亂之後其難治乎徵曰大亂之易治譬飢人之易食也帝曰古不云善人爲邦百年然後勝殘去殺邪答曰此不爲聖哲論也聖哲之治其應如響晷月而可蓋不其難封德彝曰徵書生好虛論徒亂國家不可聽徵曰五帝三王不易民以教行帝道而帝行王道而王顧所行如何爾黃帝逐蚩尤七十戰而勝其亂因致舞爲九黎害德顛頊征之已克而治桀爲亂湯放之紂無道武王伐之湯武身及太平若人漸澆詭不復返朴今當爲鬼爲魅尙安得而化哉德

彝不能對然心以爲不可帝納之不疑至是天下大治蠻夷君長襲衣冠帶刀宿衛東薄海南踰嶺戶闔不閉行旅不齎糧取給于道帝謂羣臣曰此徵勸我行仁義旣效矣惜不令封德彝見之俄檢校侍中進爵郡公帝幸九成宮宮御舍圍川宮下僕射李靖侍中王珪繼至吏改館宮御以舍靖珪帝聞怒曰威福由是等邪何輕我宮人詔并按之徵曰靖珪皆陛下腹心大臣宮人止後宮掃除隸耳方大臣出官吏諮朝廷法式歸來陛下問人間疾苦夫官舍固靖等見官吏之所吏不可不謁也至宮人則不然供饋之餘無所參承以此按吏且駭天下耳目帝悟寢不問後宴丹霄樓酒中謂長孫无忌曰魏徵王珪事隱太子巢刺王時誠可惡我能棄怨用才無羞古人然徵每諫我不從我發言輒不卽應何哉徵曰臣以事有不可故諫若不從

氏姓譜

卷九

五末

魏氏

四

輒應恐遂行之帝曰第卽應須別陳論顧不得徵曰昔舜戒羣臣爾無面從退有後言若面從可方別陳論此乃後言非稷禹所以事堯舜也帝大笑曰人言徵舉動疏慢我但見其嫵媚耳徵再拜曰陛下導臣使言所以敢然若不受臣敢數批逆鱗哉七年爲侍中尙書省滯訟不決者詔徵平治徵不素習法但存大體處事以情人人悅服進左光祿大夫鄭國公多病辭職帝曰公獨不見金在鑛何足貴邪善冶銀而爲器人乃寶之朕方自比于金以卿爲良匠而加礪焉卿雖疾未及衰庸得使爾徵懇請數却愈牢乃拜特進知門下省事詔朝章國典參議得失祿賜國官防閤並同職事文德皇后旣薨帝卽苑中作層觀以望昭陵引徵同升徵熟視曰臣眊昏不能見帝指示之徵曰此昭陵邪帝曰然徵曰臣以爲陛下望獻陵若昭陵臣固見

之帝泣爲毀觀尋以定五禮當封一子縣男徵請封孤兄
子叔慈帝愴然曰此可以勵俗卽許之後幸洛陽次昭仁
宮多所譴責徵曰隋惟責不獻食或供奉不精爲此無限
而至于亡故天命陛下代之正當兢懼戒約奈何令人悔
爲不吝若以爲足今不啻足矣以爲不足萬此寧有足邪
帝驚曰非公不聞此言帝宴羣臣積翠池酣樂賦詩徵賦
西漢其卒章曰終藉叔孫禮方知皇帝尊帝曰徵言未嘗
不約我以禮它日從容問曰比政治若何徵見久承平帝
意有所忽因對曰陛下貞觀之初導人使諫三年以後見
諫者悅而從之比一二年勉強受諫而終不平也帝驚曰
公何物驗之對曰陛下初卽位論元律師死孫伏伽諫以
爲法不當死陛下賜以蘭陵公主園直百萬或曰賞太厚
答曰所以賞之此導人使諫也後柳雄妄訴隋資有司得

氏姓譜

卷五

五未 魏氏

四

劾其僞將論死戴胄奏罪當徒執之四五然後赦謂胄曰
第守法如此不畏濫罰此悅而從諫也近皇甫德參上書
言修洛陽宮勞人也收地租厚歛也俗尙高髻宮中所化
也陛下志曰是子使國家不役一人不收一租宮人無髮
乃稱其意臣奏人臣上書不激切不能起人主意激切卽
近訕謗于時陛下雖從臣言賞帛罷之意終不平此難于
受諫也帝悟曰非公無能道此者人苦不自覺耳先是帝
作飛山宮徵上疏諫是歲大雨穀洛溢毀宮寺十九漂居
人六百家徵陳事切諫帝手詔嘉答于是廢明德宮元圃
院賜遭水者它日宴羣臣帝曰貞觀以前從我定天下開
闢草昧房元齡功也貞觀之後納忠諫正朕違爲國家長
利徵而已雖古名臣亦何以加親解佩刀以賜二人帝嘗
問羣臣徵與諸葛亮孰賢岑文本曰亮才兼將相非徵可

比帝曰徵蹈履仁義以弼朕躬欲致之堯舜雖亮無以抗時上封者衆或不切事帝厭之欲加譙黜徵曰古者立謗未欲聞已過封事其謗木之遺乎陛下思聞得失當恣其所陳言而是乎爲朝廷之益非乎無損于政帝悅皆勞遣之十三年阿史那結社率作亂雲陽石然自冬至五月不雨徵上疏極言帝曰朕今聞過矣願改之以終善道有違此言當何施顏面與公相見哉方以所上疏列爲屏障庶朝夕見之兼錄付史官使萬世知君臣之義因賜黃金十斤馬二匹高昌平帝宴兩儀殿歎曰高昌若不失德豈至于亡然朕亦當自戒不以小人之言而議君子庶幾獲安也徵曰昔齊桓公與管仲鮑叔牙甯戚四人者飲桓公請叔牙曰盍起爲寡人壽叔牙奉觴而起曰願公無忘在莒時使管仲無忘束縛于魯時使甯戚無忘飯牛車下時桓

氏姓譜

卷九

五末

魏氏

四一

公避席而謝曰寡人與二大夫能無忘夫子之言則社稷不危矣帝曰朕不敢忘布衣時公不得忘叔牙之爲人也帝遣使者至西域立葉護可汗又遣使賫金帛諸國市馬徵曰彼必以爲意在馬不在立可汗可汗得立必不懷恩諸蕃聞之以中國薄義重利未必得馬而先失義矣帝遂止是後右僕射缺欲用徵徵讓得不拜皇太子承乾與魏王泰交惡帝曰當今忠謇貴重無踰徵我遣傳皇太子一天下之望羽翼固矣卽拜太子太師徵以疾辭詔答曰漢太子以四皓爲助我賴公其義也公雖卧可擁全之十七年疾甚徵家初無正寢帝命輟小殿材爲營構五日畢並賜素褥布被以從其尙令中郎將宿其第動靜輒以聞藥膳賜遺無算中使者綴道帝親問疾屏左右語終日乃還復與太子至徵第徵加朝服拖帶帝悲懣拊之流涕問所

徵對曰獲不恤緯而憂宗周之亡帝將以衡山公主降其子叔玉時主亦從帝曰公彊視新婦徵不能謝是夕帝夢徵若平生及且薨帝臨哭爲之慟罷朝五日太子舉哀西華堂詔內外百官朝集使皆赴喪贈司空相州都督諡曰文貞給羽葆鼓吹班劍四十人陪塋昭陵將塋其妻裴辭曰徵素儉約今假一品禮儀物褒大非徵志見許乃用素車白布幘帷無塗車芻靈帝登苑西樓望哭盡哀晉王奉詔致祭帝作文於碑遂書之又賜家封戶九百帝後臨朝歎曰以銅爲鑑可正衣冠以古爲鑑可知興替以人爲鑑可知得失朕嘗保此三鑑內防已過今魏徵逝一鑑亡矣徵狀貌不逾中人有志膽每犯顏進諫雖逢帝甚怒神色不徙而天子亦爲霽威議者謂賁育不能過遼東之役高麗韃韞犯陣李勣等力戰破之軍還悵然曰魏徵若在吾

氏姓譜

卷九

五木

魏氏

四

有此行邪卽召其家到行在賜勞妻子以少牢祠其墓復立碑恩禮加焉四子叔玉叔琬叔璘叔瑜叔玉襲爵爲光祿少卿神龍初以其子膺紹封叔璘禮部侍郎武后時爲酷吏所殺叔瑜豫州刺史善草隸以筆意傳其子華及甥薛稷世稱善書者前有虞褚後有薛魏華爲檢校太子左庶子武陽縣男開元中寢堂火子孫哭三日詔百官赴弔徵五世孫暮

魏暮字申之擢進士第同州刺史楊汝士辟爲長春宮巡

官文宗讀貞觀政要思徵賢詔訪其後汝士薦爲右拾遺

暮姿宇魁秀帝異之邕管經畧使董昌齡誣殺參軍衡方

厚貶徽州司戶俄徙峽州刺史暮諫曰王者赦有罪唯故

無赦比昌齡專殺不辜事跡暴章家人銜冤萬里投訴獄

窮罪得特被矜貸中外以爲屈法今又授刺史復使治人

案憲章乘至治不見其可有詔改洪州別駕御史中丞李
孝本宗室子坐李訓事誅死其二女没入宮。謩上言陛下
卽位不悅聲色于今十年未始採擇數月以來稍意聲伎
教坊閱選百十未已莊宅收市疊疊有聞今又取孝本女
內之後宮宗姓不育寵幸爲累傷治道之本帝卽出孝本
女詔曰乃祖在貞觀時指事直言無所避每覽國史朕與
嘉之謩爲拾遺屢有獻納夫備灑掃于內非曰聲伎恤宗
女之幼不爲漁取然疑似之間不可戶曉謩辭深切其惜
我之失不亦至于謩雖居位日淺朕何愛一官增直臣之
氣其以謩爲右補闕先是帝謂宰相曰太宗得徵參禪關
失朕今得謩又能極諫朕不敢仰希貞觀庶幾處無過之
地教坊有工善爲新聲者詔授揚州司馬議者頗言司馬
品高卽官刺史迭處不可以授賤工帝意右之宰相論諫

氏姓譜

卷九

五末 魏氏

四

官勿復言謩獨固諫不可工降潤州司馬荆南監軍呂令
琬縱兼卒辱江陵令觀察使韋長避不發移內樞密使言
狀謩劾長任廉察知監軍侵屈官司不以上聞私自近臣
亂法度請明其罰不報俄爲起居舍人帝問卿家書詔頗
有存者乎謩對惟故笏在詔令上送鄭覃曰在人不在笏
帝曰覃不識朕意此笏乃今甘棠帝因敕謩曰事有不當
毋嫌論奏謩對臣頃爲諫臣故得有所陳今則記言動不
敢侵官帝曰兩省屬皆可議朝廷事而毋辭也帝索起居
注謩奏古置左右史書得失以存鑒戒陛下所爲善無畏
不書不善天下之人亦有以記之帝曰不然我旣嘗觀之
謩曰向者取觀史氏爲失職陛下見則後來所書必有
諱屈善惡不實不可以爲史且後代何信哉乃止中尉仇
士良捕妖民賀蘭進興及黨與治軍中反狀具帝自臨問

詔命斬囚以徇御史中丞高元裕建言獄當與衆共之刑部大理法官也決大獄不與知律令謂何請歸有司未報暮上言事繫軍卽推軍中如齊民宜付府縣今獄不在有司法有輕重何從而知帝停決詔神策軍以官兵留仗內餘付御史臺臺禪士良不敢異卒皆誅死擢諫議大夫兼起居舍人宏文館直學士暮固讓不見可乃拜始暮之進李珣楊嗣復實推引之武宗立暮坐二人黨出爲汾州刺史俄貶信州長史宣宗嗣位移郢商二州刺史召授給事中遷御史中丞發駙馬都尉杜中立姦賊權威縮氣俄兼戶部侍郎事暮奏中丞紀綱所寄不宜雜領錢穀乞專治戶部詔可頃之進同中書門下平章事建言今天下粗治惟東宮未立不早以正人傳導之非所以存副貳之重且泣下帝爲感動自敬宗後惡言儲嫡事故公卿無敢開陳

氏姓譜

卷五

五末

魏氏

五

者時帝春秋高嫡嗣未辨暮輔政自發其端朝議歸重會詹毗國獻象暮以爲非土性不可畜請還其獻詔可河東節度使李業殺降虜邊部震擾業內恃憑藉人無敢言者暮奏徙滑州遷中書侍郎大理卿馬曙有犀鎧數十首懼而瘞之奴王慶以怨告曙藏甲有異謀按之無它狀投曙嶺外慶免議者謂奴訴主法不聽暮引律固爭卒論慶死累遷門下侍郎兼戶部尚書大中十年以平章事領劍南西川節度使上疾求代召拜吏部尚書用久疾檢校尚書右僕射太子少保卒年六十六贈司徒暮爲宰相議事天子前它相或委抑規諷惟暮黨切無所回畏宣宗嘗曰暮名臣孫有祖風朕心憚之然卒以剛正爲合狐獠所忌讒罷之

魏知古深州陸澤人方直有雅才擢進士第以著作郎修

國史累遷衛尉少卿檢校相王府司馬神龍初爲吏部侍郎以母喪解服起爲晉州刺史睿宗立以故屬拜黃門侍郎兼修國史會造金仙玉真觀雖盛夏工程嚴促知古諫曰臣聞古之君人必時視人之所勤人勤于力則功築罕人勤于財則貢賦少人勤于食則百事廢故曰不作無益害有益又曰罔拂百姓以從己之欲禮季夏之月樹木方盛無有斬伐不可以興土功此皆興化立治爲政養人之本也今爲公主造觀將以樹功祈福而地皆百姓所宅卒然迫逼令其轉徙扶老攜幼剔椽發瓦呼嗟道路乖人事違天時起無用之作崇不急之務羣心振搖衆口藉藉陛下爲人父母欲何以安之且國有簡冊君舉必記言動之微可不慎歟願下明詔順人欲除功役收之桑榆其失不遠不納復疏諫帝嘉其直以左散騎常侍同中書門下三

氏姓譜 卷五

五末 魏氏

吳

昂元宗在東宮又兼左庶子先天元年爲侍中從獵渭州獻詩以諷手制褒答并賜物五十段明年封梁國公實懷貞等詭謀亂國知古密發其姦懷貞誅賜封二百戶物五百段元宗恨前賞薄子勳更加百戶旌其著節是冬詔知東都吏部選事以稱職聞優詔賜衣一副自是恩意尤渥由黃門監改紫微令與姚元崇不協除工部尚書罷政事開元三年卒年六十九宋璟聞而歎曰叔向古遺直子產古遺愛兼之者其魏公乎贈幽州都督謚曰忠所薦洹水令呂太一蒲州司功參軍齊澣右內率騎曹參軍柳澤密尉宋遙左補闕袁暉右補闕封希顏伊闕尉陳希烈後皆有聞于時文宗太和二年求其曾孫處訥授湘陽尉與魏徵裴冕後擢任之

魏奉古初仕爲雍州尉九日公宴有客草序五百言奉古

曰此舊文也援筆倒疏之徐笑曰適覽記之耳由是知名
挺涖汴州召奉古前曰此聰明尉也

魏嵩號王屋山人嘗自嵩歷兗遊梁入吳計程數千里來
訪李白不遇因下江東尋諸名山觀謝公石門後于廣陵
與白相見白稱其美而愛文好古獨往物表述詩以贈之
嵩亦有答李篇見李詩集中并白詩自序

宋

魏仁浦字道濟汲縣人幼孤貧母爲假黃縑製暑服仁浦
年十三歎曰爲人子不能養乃使慈母求貸以衣我乎因
位下辭母詣洛陽濟河沈衣中流誓曰不貴達不渡此河
晋末爲密院刀筆吏端謹善書密切心計不願事降將杜
重威遁去會漢祖起迎謁鞏縣補舊職時周祖掌樞密召
問關下卒乘之數悉能記之手疏六萬人祖喜遂從鎮鄴

氏姓譜

卷七

五末

魏氏

吧

後隱帝密詔李洪義加害周祖懼謀于仁浦對曰待中握
強兵臨重鎮有功朝廷君上信讒圖害忠良雖欲剖心自
明奚可得乎今詔始下外無知者莫若更易其語以盡誅
將士爲名激其怒心非徒自免且可爲楊史雪冤祖深然
之僞爲詔旨以示諸將衆懼且怒遂長驅渡河事成超擢
樞密副承旨俄遷右羽林將軍周祖問諸州屯兵之數及
將校名氏手疏于紙校籍無差尤倚重焉母喪起復值周
祖大漸語世宗曰李洪義長與節鎮魏仁浦無遣違禁密
及卽位授右監門衛大將軍樞密副使進檢校太保加太
傅賜爵邑俄遷中書侍郎平章事集賢殿大學士兼樞密
使恭帝拜刑部尚書宋興進右僕射兼中書侍郎以疾在
告太祖幸其第賜黃金泉布等再上表乞骸不許乾德初
罷守本官開寶二年春宴太祖密諭朕欲親征太原如何

對曰欲速不達惟陛下慎之宴罷賜上尊御膳從征至中途遇疾還至梁侯驛薨年五十九贈侍中景德中謚宣懿爲人性寬大有度接士大夫有禮務以德報怨權璽使鄭元昭與仁浦婦翁李溫玉有隙誣溫玉以叛周祖知而不問後元昭不自安仁浦畧不芥蒂白周祖召元昭至京授慶州刺史隱帝寵作坊使賈延徽欲并仁浦居第屢譖之周祖入汴延徽被擒仁浦力保全之時稱長者

魏勝字彥威宿遷人徙居山陽多智有勇善騎射應募爲弓箭手金亮敗盟朝廷籍諸路民爲兵勝躍曰此其時也聚義士二百北渡淮取漣水宣布朝廷德意不殺一人漣水民翕然以聽復規取海州僞守高文富遣兵來捕勝迎擊走之追至城下責以大義城上民聞之莫有禦者遂擒文富民皆按堵勝權知州事遣人諭朐山懷仁沭陽東海

氏姓譜

卷九

五末

魏氏

吳

諸縣皆定乃蠲租稅釋罪囚發倉庫犒戰士分忠義士爲五軍紀律明肅部分如宿將益募忠義以圖收復遠近聞之響應卽具其事報境上已乃助統制董成直入沂州州民壁蒼山者數十萬受金圍砦首滕景告急于勝提兵往救解其圍時起義雖久朝廷尙未知曾李寶遣其子公佐由海道覘敵至州始遣忠義將朱震褚道隨寶詣行在白姓名金亮與兵渡淮慮勝晚其後分軍數萬來攻與寶同擊于新橋大敗之奏功授闕門祗候差知海州兼山東路忠義軍都統遣其子昌同嗣晦山首領張榮持旗榜益結山東忠義勝善用大刀能左右射揭旗曰山東魏勝金人望見卽退走初尙無州郡糧餉府庫倉廩惟經畫市易酒課權璽勸羅豪右環海州縣度可攻取處築城後隍阻塞關隘恒如寇至未嘗一日懈弛方糾集遠邇犒勞士卒會

亮被弑議和撤戍轉勝知楚州詔專措置清河口勝覬知
金人以舟載器甲糧糗自清河出欲侵邊身帥忠義士拒
之都統制劉寶以方議和不許金騎軼境復率諸軍拒于
淮陽自卯至申勝負未決金增生兵來勝與力戰又遣人
告急寶不發一兵勝矢盡救不至猶依土阜爲陣令步卒
居前騎爲殿語曰我當死此得脫者歸報天子至淮陰東
十八里中矢墜馬死年四十五事聞贈保寧軍節度使諡
忠壯詔薨鎮江立廟江口鎮賜號褒忠官其二子

魏在字邦達唐相知古後少頴悟能守所學不爲新說所
惑宣和二年上舍及第建炎四年除詳定勅令所刪定官
紹興元年遷樞密院計議官考功郎中應詔言星變之異
在至劉光世軍諭以賊衆我寡合力猶懼不支若自爲心
將何以戰當思爲國雪恥釋去私隙不獨有利于國亦將

氏姓譜

卷九

五木 魏氏

兜

有利于身光世許之貽書張韓示以無他張韓亦復書交
歡由此衆戰屢捷軍聲大振在職七月論事百二十餘遷
祕書少監乞外除直龍圖閣知建州尋召還權吏部侍郎
命銷伴金使辭以嘗非和議難于應對秦檜召問所以不
主和之意在具陳敵情難保檜曰公以智料敵不若檜以
誠待敵答曰相公固然第恐敵人之不若是耳檜不能屈
因改命吳表臣入見言賊豫乃金人所立北面誠宜陛下
承祖宗基業天命所歸何藉于金傳聞金人欲要我以難
行之禮儻輕許之他時必爲所制號令廢置將出其手一
有不從便生兵隙予奪在彼失信在我非計之所得也雖
使還我空地異時正恐難保雖欲寢兵息民亦將何及更
願審思天下治亂之機酌之羣情擇其經久可行者行之
其不可從者拒以國人之意庶無後悔未幾以憂歸凡

任祠祿卒

魏丕字齊物相州人世宗鎮瀘淵辟爲司法參軍有盜五人獄已具丕疑其寃緩之果獲真盜世宗嘉其明慎歷知頓邱冠氏元城三縣復改右班殿直自陳頗涉學問願受儒資時因用武籍其幹辦不許未幾出監明靈砦軍獲江南謀者四人部送行在詔獎之賜錢十萬遷供奉官進供備庫副使宋興改作坊副使語以作坊久弊命修治之轉正使在職盡力開寶九年領代州刺史凡典工作十餘年討澤潞維揚下荆廣收川陝征河東平江南皆先期諭旨命修剝器械無不精辦舊床子弩射止七百步丕重造遠至千步及改繡衣鹵簿專敕裁製常撤本坊舊屋爲儼舍收直及鬻死馬骨以給工匠之有喪者將幸洛三司使王仁贍議雇民車牛運法物太祖以勞民不悅丕請棟本坊

氏姓譜

卷九

五末

魏氏

季

匠少壯者二千餘分遞舖輸之時以爲便雍熙四年轉戶部使端拱初遷度支使出爲黃州刺史還朝召對便坐賜御書急就章宋邸集退作歌以獻願授臺省之職太宗面諭知卿本儒然清望官奉給不若刺史之優也淳化初歷汝鳳襄三州境內旱虔禱多應還授左武衛大將軍尋判金吾街仗初六街巡警皆用禁卒丕請左右街各募卒千人優以廩給使傳呼備盜分以四營免調禁兵時甚便之五年改鄆州州復州遷左驍衛大將軍卒年八十一生平頗能詩與士大夫遊嘗使李煜邀登昇元閣賦詩有朝宗海浪拱星辰之句以風動之又楊承信帥河中或言其反側未安命丕使還言其無狀此亦可稱者

魏揆之子子實建陽人幼有大志嘗師胡憲登鄉舉禮部不第遂不復出築室讀書牋以良齋自稱良齋先生汪應

辰薦其賢乾道中詔舉遺逸刺史芮晔復表其行誼召之
揆之力辭陳俊卿雅知揆之招致甚力乃以布衣陳當時
之務勸上修德業正人心養士氣爲恢復之本上嘉納之
賜同進士出身守太學錄先時學官養望自高不與諸生
接揆之至卽增葺學舍日進而教誨之人咸感勵未半歲
請廢王安石父子從祀追爵程顥程頤又請罷詞賦空言
取人宜以德行經術爲先其次則暹習世務亦不報喟然
嘆曰上恩深如此而吾德學不足以感悟聖意遂丐去會
倖臣曾覲召還復累疏諫遺書陳俊卿責其不能揀止語
甚切至罷爲台州教授覲至國門外已久住于龍山伺揆
之去乃敢入旣歸日居良齋條理舊聞以求其所未至平
居謹喪祭重禮法有從父客于南揆之千里迎養旣死葬
之如禮仍字其孤建俗多生子不舉揆之爲文以戒全活

氏姓譜

卷九

五末

魏氏

五

者衆有不羣親者爲白于官與之期約貧者周之無後者
掩之遇歲饑爲粥以飼依古法夏貸冬取自此諸鄉始立
社倉與人交嘉其善而揀其失接後進以禮苟有寸長必
推挽而成就之惟訾其或近于名病葦母視之尙不巾不
見戒其子勿以僧巫俗禮挽我素與朱熹遊召至委以後
事而卒年五十八贈宣教郎直秘閣平日趣向與熹相同
乾道中熹被召將行聞揆之去國乃止

魏了翁字華父卽州人本姓高出繼魏氏自幼英悟數歲
入學儼如成人讀書過目不載覽年十五著韓愈論潛心
正學從李燔輔廣遊時嚴僞學之禁了翁獨倡其說毅然
不回登慶元進士授劍南西川節度判官召爲國子正改
武學博士開禧元年召試學士院韓侂胄方開邊釁人莫
敢言了翁對策言國家紀綱不立國是不定風俗苟偷邊

備廢弛財用凋耗人材衰弱求之在我未見可以勝人之
實願急于自修不可舉天下而試于一擲時論建之改祕
書正字遷校書郎以親老乞外知嘉定州奉親還里侂胄
誅史彌遠相了翁力辭召命丁生父憂解官心喪築室白
鶴山下闢所舊聞知名士如游似吳詠牟子才皆造門受
業尋差知漢州以敦化善俗爲治民敬奉條教不敢犯適
境內橋壞民有壓死者坐降秩奉祠未幾復官知眉州眉
俗魯法令持吏短長號難治了翁至乃尊禮耆耆簡拔俊
秀朔望親爲講說詣學宮誘掖指授舉行鄉飲酒禮以示
教化增貢士員以振文風復墓願堰築江鄉館士論大服
俗爲丕變以治行薦擢潼川路提點刑獄兼提舉常平又
遷轉運判官戡吏姦詢民瘼舉刺不避權右風采肅然櫟
權遂寧增埤浚隍如敵將至後一年有潰卒攻掠旁郡知

氏姓譜

卷九

五末

魏氏

五

遂寧有備不敢犯遷直秘閣主管潼川路安撫司公事母
憂免喪差知潼川約已裕民治效大著了翁去國十有七
年始被召上迎勞優渥入對首論人與天地一本必與天
地相似而後可以無曠天位次論人才風俗五事并郡邑
強幹弱枝之弊所宜變通上嘉納之進兵部郎中改司封
兼國史編修轉對首言江淮襄蜀當分爲四重鎮擇人以
任虛心以聽假以事權資以財用爲聯絡守禦之計次論
蜀邊墾田及實錄闕文等事嘉定十六年爲省試參詳官
累遷起居舍人入奏言事變倚伏人心向背疆場安危鄰
寇動靜其幾有五宜察時幾恭天命尊道揆嚴法守集思
廣益汲汲圖之又言君臣上下必同心一德而後平居有
所補益緩急有所倚仗不可人自爲謀面從腹誹習諛腫
陋臣實懼焉願陛下察人心之邪正推世變之倚伏開拓

規模收拾人物庶幾臨事無乏才之歎其言剴切會史彌遠專權廢立了翁積憂成疾求退不許遷起居郎寶慶元年雷發非時理宗言朕心終夕不安了翁因奏義理所安人心卽謂之天非此心之外別有所謂天地神明也陛下盍卽所不安而求之對天地事大母見羣臣親講讀皆隨事反求則大本立而無事不可爲矣又言願敷求碩儒不闡正學圖久安長治之計申命大臣于除授之際公聽並觀然後實意所孚善類皆出權工部侍郎辭疾改集英殿修撰出知常德李知孝朱端常劾之降三官安置靖州了翁常言道器不相離自秦漢以來諸儒莫得其要近世復好爲鹵莽其求于傳註者舛譌牴牾于古人之遺制前哲之緒言旣無以明辨其是非而各物度數之幸存者又不察其本末乃盡取九經注疏正義之文據事別類錄爲九

姓氏譜

卷見

五末 魏氏

五三

經要義紹定五年起寶章閣待制潼州路安撫使知瀘州瀘素稱大藩控制邊面二千里武備不修城郭不治了翁爲重葺樓櫓增置器械教習牌手申嚴軍律興學校蠲宿負復社倉切義塚百廢具舉進華文閣賜金帶時權臣相繼擅國了翁應詔論十弊上讀之感動多舉行之召權禮部尚書兼直學士院同修國史入對首陳彌遠十罪改吏部尚書兼侍讀上改容聽受詢察政事咨訪人才常至漏下四十刻而退了翁六閱月前後二十餘奏皆當時急務上悉嘉納之將引以知政忌者合謀排擯謂了翁知兵體國乃以端明殿學士同簽書樞密院事出督視京湖軍馬適邊警沓至上心焦勞了翁嫌于避事不得已受命上勉勞甚至尋兼提舉編修武經叢書恩數同執政進封臨川郡開國侯賜便宜詔書如張浚故事朝辭面賜御書唐人

嚴武詩鶴山書院大字及金帶鞍馬詔宰臣飲餞遂開府
江州申儆將帥調遣援師褒死事之臣黜退懦之將奏邊
防十事甫及二旬召還尋改資政殿學士安撫湖南浙東
福建知潭州改紹興福州皆辭免奉祠洞霄宮嘉熙元年
疾革門人來問猶正衣冠語相問答且曰平生處已澹然
無營已而口授遺奏拱手而逝表聞上震悼輟朝歎惜用
才不盡贈太師謚文靖賜蘇州宅一區贈秦國公所著有
鶴山集周易集義易舉隅周禮井田圖說古今考經史雜
抄師友雅言

魏野字仲先陝人李漬表弟世爲農母夢引袂于月中承
兔得之及長耽嗜吟咏不求聞達居州之東郊手植竹樹
清泉環繞旁對雲山景趣幽絕鑿土表丈曰樂天洞前爲
草堂彈琴其中好事者多載酒肴從之嘯咏終日前後郡

氏姓譜

卷九

五末

魏氏

五

守武臣故相皆加禮遇或親造之往往留題累宿而去性
不喜巾幘見賓客惟白衣草履出則跨白驢趙昌言素倨
獨野至戒闈吏卽報特置賓次爲詩精苦有唐人風格句
多警策著草堂集十卷祥符初契丹使言本國得其上帙
願求全部詔與之祀汾陰與漬並薦遣陝令王希招野野
自言願守畝畝永荷帝力上不之強詔州縣長吏常加存
撫合圖所居觀之生平無疾以漬訃至哭之慟命子往赴
曰吾不可往往必不至裁六日果卒年六十州上其狀詔
贈秘書省著作郎

魏漢津本蜀黥卒先從范鎮窺其制作後託師事唐仙人
李良號李八百者授以閉法兼通陰陽術數言多奇中嘗
過三山龍門聞水聲知其下有玉脫衣沒水抱石而出果
玉也皇祐中與房庶俱以善樂薦得召見獻議本黃帝夏

禹聲律身度之說謂人主賦形與衆異請以帝指三節三寸爲度定黃鐘之律而中指之徑圍則度量權衡所自出也又云聲有太有少太者清聲陽也天道也少者濁聲陰也地道也中聲在其間人道也合三才之道備陰陽奇偶然後四序可得而調萬物可得而理當時以爲迂怪蔡京獨神之從其請先鑄九閏次鑄帝坐大鐘及二十四氣鐘崇寧四年三月閏成奉安于九成宮賜號冲顯處士時年九十餘八月新樂成賜名大晟樂置府建官加賜虛和冲顯賓應先生願其樂書天下嘗與京言大晟獨得古意什三四爾他多非古說異曰當以訪受學弟子任宗堯而京客劉昂主樂事論太少之說爲非將議改作旣而以樂成久易之恐難遂止漢津議制閏名以奠入方曰蒼閏彤閏品閏實閏魁閏鳥閏壯閏風閏凡八而中央曰帝閏皆以

氏姓譜

卷九

五末

魏氏

五

九州水土納其中及奉安翌日上幸九成宮酌獻至北方實得忽漏水溢于外爵謂取土于雄州界非燕之正方後乃終于北方致亂當時莫不神之漢津嘗語所知不三十年天下亂矣未幾死京遂召宗堯爲典樂復欲有所建而爲田異所奪後卽鑄閏之所建寶成殿祀黃帝夏禹成王周召封漢津爲嘉晨侯與良戚配食有馬賁者亦出京門在大晟府方魏劄任田議論時依違其間無所贊正擢至通議大夫徽猷閣待制當時名器之濫如此

魏泰襄陽人崇觀間章惇欲官之竟弗就還家善文章著臨漢隱居集二十卷又著東軒筆錄十五卷嘗賦襄陽形勝識者偉之

魏二翁濮州雷澤人遇異人得道手持蒲筴時時語人禍福里閭重之或制纈奉以御寒盜夕至欲竊之二翁呼其

名曰陶欲我續乎盜驚謝而去徽宗聞其名遣使起之至其廬但聞鼻息齟齬如雷不見形影惟得頰一章以歸宣和初忽尸解去

魏懋字覺民甌寧人第進士紹興初調虔州零都令時江西盜起虔諸邑多失守懋出已帑犒勵弓級誓與死守有巨寇譙樵者來攻是邑累日不能尅乃遁去大將岳飛持懋之先墓者懋號慟曰此不共戴天讐也卽棄官歸比至寇已平懋緝得二凶梟之墓右上狀自劾郡將義之釋不問後知南昌縣卒

魏文翁了翁弟舉進士爲眉山尉後知叙州嘗讀禮將爲善思貽父母令名必終日諷味不能釋自號果齋

氏姓譜 卷九

五末 魏氏 五

魏璘天祿元年上命馳馬較遲疾以爲勝負問王白及璘孰勝白奏赤者勝璘曰臣所見驄馬當勝二人爭議不決上問其故白曰今日火王故知赤者勝璘曰不然火雖王而上有煙以煙察之青者必勝已而竟如璘言上嘉之察劉謀逆私卜于璘謂曰大王之數得一日宜慎之果一日而敗應歷中周兵犯燕上以勝敗問璘對曰周姓柴燕分火柴入火必焚其言果驗又嘗爲罨撒葛卜僭立事上聞之免死流烏古部一日節度使召璘適有獻雙鯉者或曰君卜此魚何時得食璘良久答曰公與僕不出今日有不測禍奚暇食魚急命烹之未及食寇至俱遇害

金

魏子平字仲均宏州人登進士調五臺主簿累除尚書省令史大理丞左司都事中擢轉運同知太府監正隆三年

爲賀宋生日副使還日海陵方謀伐宋問蘇州與大名孰優對曰江湖地卑濕夏服蕉葛猶不堪暑安得與大名比海陵不悅世宗卽位除戶部侍郎從僕散忠義掌河南餽運給金牌一銀牌六糧道給辦進戶部尙書大定六年復爲賀宋生日使故事無再往者上用此以優其勞還拜參知政事上問古者稅民什一而民足今百一而民不足何也對曰什一取其公田之入今無公田而稅其私田爲法不同古有一易再易之田今一切與上田均稅之此民所以困也又問戍卒逃亡物故欲按物力高者補之對曰富家子弟驍懦用以守戍歲時求索無厭家產隨壞不若按物力多寡賦之以募材勇騎射之士庶幾官收實用上從之海州捕賊八十餘其賊首之兄任宋軍官上語宰相和好恐不能久今宿泗間漢軍宜易以女直軍對曰誓書稱

氏姓譜

卷九

五本 魏氏

七

沿邊州城除自來合設置射糧軍數并巡尉外更不得屯軍守戍上謂此更代非增戍也未幾又問前日令內任官六品以上外任五品以上並舉所知何未聞有舉者豈真無才抑知而不舉乎平請令當舉之官每任須舉一人惟視其當不以爲賞罰宋制凡薦舉人犯私罪舉主雖至宰執亦坐降罰人心有恆者鮮財利怵于前或變其所守宰臣任大責重豈坐是以爲升黜耶無何刺史澤州劉德裕祈州斜哥同知滄州訛里也易州訛里刺楚邱合劉春哥以贓汙抵罪上欲詔示中外丞相守道言不可以問乎平對曰臣聞懲一戒百陛下回宜行之上遂降詔焉南京統軍奏宋人于襄陽漢江上造舟爲三浮梁調兵移屯募民運糧復置所罷制置因請備之上令宰臣度其事勢乎平曰臣聞襄陽薪芻皆于江北取給殆爲此也上曰朕與

卿等及今治其未然若俟有事然後治之則亦晚矣使修起居注粘割幹特刺詰問皆如子平策還奏詔凡妄說邊關兵事者徒二年告人得實賞錢五百貫時議牛盡力稼穡有功于人欲罷爲牲子平奏惟天地宗廟宜用所以異大祀之禮從之十一年罷爲南京留守未幾致仕十五年起爲平陽尹復致仕二十六年薨于家

魏全壽州人泰和六年宋李爽圍壽州刺史徒單義盡籍城中兵民及部曲廝役得三千餘人隨機拒守義善撫御得衆情婦人皆樂爲用同知滿烈古中流矢卒義益勵不衰募人往砍爽營全在選中爲爽兵所執至死罵不絕口僕散揆遣河南統軍判官乞住及買哥等以騎二千人救壽州與爽兵遇乞住分兩翼夾擊梁義出兵應之爽兵大潰斬首萬餘級赴淮死者甚衆爽與其副田林僅脫身走

氏姓譜

卷九

五木

魏氏

五

詔遷義防禦使乞住同知武昌軍節度使事買哥河南路統軍判官贈蒲烈古昭勇大將軍贈魏全宣武將軍蒙城縣令封其妻爲鄉君賜錢百萬俟其子至十五歲收克八貫石正班局所贈官蔭以全節送史館鏤諭天下

魏道明易縣人少工詩有名舉進士累官至安國軍節度使居近雷溪因號雷溪子所居有畹新詩話

元

魏初字太初宏州順聖人從祖璠金進士補尚書省令史金將武仙軍次五梁山不進使璠往諭之璠直趨仙所仙引一吏與語璠大言曰王人雖微序在諸候之上將軍奈何不加禮而欲以小吏置對且將軍跳山谷而左右無異心者以天子大臣故也苟不知尊天子安知麾下無如將軍者仙不能屈金亡璠北還憲宗聞其名徵至和林璠條

陳三十餘事卒諡靖肅初其從孫也璠無子以初爲後初好讀書尤長于春秋爲文簡而有法比冠有聲中統初中書省辟爲掾史兼掌書記未幾以祖母老辭歸隱居教授會詔左丞許衡學士竇默及京師諸儒各陳經史所載前代帝王嘉言善政選進讀之士有司以初應帝雅重璠名方之古直詢知初爲璠後歎獎久之授國史院編修官尋拜監察御史首言法者持天下之具御史臺則守法之司也方今法有未定百司無所持循宜叅酌考定頒行天下帝宴羣臣于上都不能爵大卮者免其冠服初上疏曰臣聞君猶天也臣猶地也尊卑之禮不可不肅方今內有太常有史官有起居注以議典禮記言動外有高麗安南使者入貢以觀中國之儀昨聞錫宴大臣威儀弗謹非所以尊朝廷正上下也疏入帝欣納仍諭侍臣今後毋復爲

氏姓譜

卷五九

五末

魏氏

五

此襄樊未下將括民爲兵或請自大興始初言京師天下根本要在殷盛建邦之初詎宜騷動遂免又言舊制常察官諸州刺史上任三日舉一人自代况風紀之職與常員異請自今監察御史按察使官在任一歲各舉一人自代所舉不當有罰不惟砥礪風節亦可爲國得人遂舉勸農副使劉宣自代歷官南臺中丞

魏中立字伯時濟南人由國子伴讀歷官西臺御史中丞遷守饒州紅巾賊倪文俊旣陷湖廣分兵攻掠州郡所在無賴子多乘間竊發不旬日衆輒數萬皆短衣草屨齒木爲杷削竹爲槍截緋帛爲巾襦彌野皆赤中立聞驚卽率丁壯分塞險要以義兵擊卻之已而賊復合遂爲所執以紅衣披其身中立叱之鬚髯盡張賊載歸斬水欲屈其從已中立大罵不已遂見殺

魏新之字德夫桐廬人宋咸淳進士著學易蠡測因先儒列卦爲方圓圖乃以己意成三隅圖曲盡妙理

魏敬益字士友雄州容城人性好施與有男女失時者出貲財爲之嫁娶歲凶老弱之饑者爲糜以食之有田僅十六頃一日語其子曰自吾買四莊村之田十頃今環村之民皆不能自給吾深憫焉今將以田歸其人汝謹守餘田可無餒也乃呼四莊村民謂曰吾買若等業使若等貧不聊生吾之不仁甚矣請以田歸焉衆皆愕眙不敢受因強與之焚其券有司以聞丞相賀太平嘆曰世乃有斯人哉詔授之官不拜

明

魏觀字杞山蒲圻人元季隱居蒲山太祖下武昌聘授國子助教再遷浙江按察司僉事吳元年遷兩淮都轉運使

氏姓譜

卷九

五末

魏氏

李

人爲起居注奉命偕吳琳以幣帛求遺賢于四方洪武元年建大本堂命侍太子說書及授諸王經未幾又命偕友原吉詹同吳輔趙壽等分行天下訪求遺才所舉多擢用三年轉太常卿攷訂諸祀典稱旨改侍讀學士尋遷祭酒明年坐考祀孔子禮不以時奏謫知龍南縣旋召爲禮部主事五年廷臣薦觀才出知蘇州府前守陳寧苛刻人呼陳烙鐵觀盡改寧所爲以明教化正風俗爲治建鬻舍聘周南老王行徐用誠與教授貢穎之定學儀王彝高啟張羽訂經史耆民周壽誼楊茂林文友行鄉飲酒禮政化大行課績爲天下最明年擢四川行省參知政事未行以部氏乞留命還任初張士誠以蘇州舊治爲宮遷府治于都水行司觀以地湫隘還治舊基又濬錦帆涇興水利或譖觀與旣滅之基帝使御史張度廉其事遂被誅帝亦尋悔

命歸塋

魏冕永豐人官御史燕兵犯闕都督徐增壽徘徊殿廷有異志冕率同官毆之與大理丞鄒瑾大呼請速加誅明日宮中火起有勸冕降者厲聲叱之遂自殺瑾亦死

魏驥字仲房蕭山人永樂中以進士副榜授松江訓導常夜分攜茗勸勞諸生諸生感奮多成就者召修永樂大典書成還任用師達薦遷太常博士帝謂曰劉履節爲御史九年高皇帝方授是官不輕予人也宣德初遷吏部考功員外郎歷南京太常寺少卿正統三年召試行在吏部左侍郎踰年實授屢命巡視畿甸遺蝗問民疾苦八年改禮部尋以老請致仕吏部尙書王直言驥未衰如念其老宜令去繁就簡乃改南京吏部復以老辭不允十四年進尙書英宗北狩驥率諸司條上時務多施行景泰元年年七

氏姓譜

卷九

五未 魏氏

六

十七致仕驥居官務大體在太常山川壇獲雙白兔圻內生瑞麥皆却不在吏部有進士未終制求考功同官將許之驥持不可法司因旱卹刑有王綱者惡逆當辟或憫其少欲緩之驥曰此婦人之仁天道不時正此故也獄決而兩正統中王振怙寵凌公卿獨嚴重驥呼先生景泰初以請老至京師大學士陳循驥門生也請問曰公雖位冢宰然未嘗立朝願少待事在循輩驥正色曰君爲輔臣當爲天下進賢才不得私一座主退語人曰渠以朝廷事爲一已事安得善終竟致仕去驥端厚祇慎顧勁直好別白君子小人恒曰無是非之心非人也家居憂國憂民老而彌篤蕭山故多水患有宋時縣令楊時湖隄遺跡驥倡修螺山石巖畢公諸塘堰捍江湖典湖利鄉人賴之居恒布衣糲食不殖生進事兄教諭驥雖耄益恭時戴笠行田園

嘗遇錢塘主簿隸訶之答曰蕭山魏驥也主簿倉皇謝慰而去成化七年御史梁昉言臣先任蕭山見致仕尙書臣魏驥里居與里人稠處教子孫孝弟力田增隄濬湖捍禦災患所行動應禮法倡理學最後進雖在林野有補浴化驥生平學行醇篤心術正大諳世事瞭國體致仕二十餘年九十八歲四方仰德有如卿雲百年化育滋此人瑞臣讀前史有以歸老賜祿軍其身者有尊養三老五更者有安車蒲輪召者有賜几杖者上齒德也驥齒德有餘雷在上卿可稱達尊乞下所司酌前代故事施行帝覽奏嘉歎遣行人存問賜羊酒命有司月給米三石使命未至而驥卒賜祭塋如禮謚文靖其子完以驥遺言詣闕辭塋乞以其金振饑民帝撫然曰驥臨終遺命猶恐勞民可謂純臣矣許之蕭山民德驥不已詣闕請祀于德惠祠以配楊時

氏姓譜

卷九

五末 魏氏

六

制曰可

魏源字文淵建昌縣人永樂四年進士除監察御史辨松江知府黃子威誣奏減浙東瀕海漁課巡按陝西西安大疫療活甚衆奏言諸府倉粟積一千九十餘萬石足支十年今民疲妨農請輸鈔代兩稅之半從之涼州土寇將爲變亟請勦亂遂息兩遭喪俱起復洪熙元年出爲浙江按察副使宣德三年召署刑部右侍郎五年河南旱荒民多轉徙帝以源廉正有爲命爲左布政使俾馳驛之任時侍郎許廓往撫輯廷議又起丁憂布政使李昌祺原官源與廓昌祺發倉廩免逋賦雜役流民漸歸兩亦旋降歲大豐居三年召還授刑部左侍郎明年永豐民夏九旭等據大盤山爲亂帝以源江西人命撫之都督任禮帥兵隨其後未至官軍禽九旭因命二人採木四川兼飭邊務英宗歸

位進尙書正統二年五月命整飭大同宣府諸邊許便宜行事源遣都督僉事李謙守獨石楊洪副之劾萬全衛指揮杜衡戍廣西明年奏大同總兵官譚廣老帝命黃真楊洪充左右參將協鎮諸將肅然按行天城朔州諸險要令將吏分守設威遠衛增修開平龍門城自獨石抵宣府增置墩堠免屯軍租一年儲火器爲邊備諸依權貴避役者悉括歸伍尋以宣大軍務久弛請召還巡撫僉都御史盧睿而薦兵部侍郎于謙爲鎮守參贊朝廷以謙方撫山西河南不聽于是言官以臨邊擅易置大臣爲源罪合疏劾之且言源爲御史嘗犯賊乃冒領誥命帝以源有勞置不問事竣還朝與都御史陳智相詈于直廬智以聞詔兩責之歲早錄上疑獄且請推行于天下報可旋坐決獄不當與侍郎何文淵俱下獄得宥復以上遼王貴烺罪狀不言

氏姓譜

卷九

五末

魏氏

六三

其內亂事與三司官皆繫詔獄累月釋還職源在刑部久議獄多平恕陝西僉事計資言武臣雜犯等罪予半俸謫極邊源以所言深刻奏寢之郎中林厚言禁刁訟告訐及擇理刑官勘重囚務憑賊具四事皆以源議得施行六年以足疾命朝朔望八年致仕卒

魏良弼字師說新建人嘉靖二年進士授松陽知縣召拜

刑科給事中採木侍郎黃衷事竣歸家乞致仕未許緝事

者奏衷潛入京師帝怒奪衷職良弼言衷大臣入都豈能

隱乞正言者欺罔罪不報張璫桂萼初罷相詔察其黨給

事中劉世揚等議及良弼以吏部言得留尋命巡視京營

劾罷提督五軍營保定侯梁永福太僕卿曾直罪武定侯

郭勛家奴論團營兵政之弊又請發銀米振京師饑直聲

大著會南京御史馬敷等以劾吏部尙書王瓊被逮良弼

請釋之帝怒并下詔獄論贖還職仍奪俸一年三遷至禮
科都給事中十一年八月彗星見東井芒長丈餘良弼引
占書言彗星晨見東方君臣爭明彗孛出井奸臣在側大
學士張孚敬專橫竊威福致奸星示異亟宜罷黜孚敬奏
良弼挾私帝已疑孚敬兩疏皆報聞給事中秦鰲疏再入
孚敬竟罷去踰月良弼復偕同官劾吏部尚書汪鉉帝方
向鉉奪良弼俸鉉孚敬俱恨良弼明年元日副都御史王
應鵬坐事下詔獄良弼言履端之始不宜以微過擊大臣
帝怒再下詔獄獄卒訝曰公又來耶爲垂涕尋復職奪俸
時孚敬復起柄政與鉉修前卻以考察後命科道官互糾
又奏上十一人又不及良弼孚敬益怒擬旨切責命吏部
再考鉉乃別糾二十六人而良弼及秦鰲葉洪皆前劾孚
敬鉉者中外大駭良弼竟坐不謹削籍隆慶初詔起廢籍

氏姓譜

卷九

五末 魏氏

奇

以年老卽家拜太常少卿致仕卒天啟初追謚忠簡

魏允貞字懋忠南樂人萬歷五年進士授荊州推官大學
士張居正歸壘羣吏趨事恐後允貞獨不赴且挾其奴治
行最微授御史吏部尚書梁夢龍罷允貞言銓衡任重往
者會推之前所司率受指執政或司禮中官以故用非其
人帝納其言特用嚴清中外翕服俄劾兵部尚書吳兌兌
引去已陳時弊四事并言自居正竊柄奏報失真遷叙逾
格賞罰無章疏人下都察院先是居正旣私其子他輔臣
呂調陽子興周張四維子泰徵甲徵申時行子用懋皆相
繼得舉甲徵用懋將廷對而允貞疏適上四維大愠言臣
待罪政府無所不當聞今因前人行私而欲臣不預聞吏
兵二部事非制也因爲子白誣且乞骸骨時行亦疏辨帝
竝慰留而責允貞言過當戶部員外郎李三才奏允貞

是竝貶秩調外允貞得許州判官給事中御史周邦傑趙
彌等論救不納允貞雖謫然自是輔臣居位其子無復登
第者久之累遷右通政二十一年以右僉都御史巡撫山
西允貞素剛果清操絕俗以所部地瘠民貧力裁幕府歲
供及州縣冗費以其銀數萬繕亭障建烽埃置器市馬易
粟又奏免平陽歲額站銀八萬以所省郵傳羨補之雁門
平定軍以道屯糧竄徙允貞奏除其租招合復業岢嵐互
市省撫賞銀六萬汾州有兩郡王宗人與軍民雜處知州
秩卑不能制奏改爲府自欵市成邊政廢允貞視要害築
邊牆萬有餘丈政聲大著帝亦數嘉其能會詔中官張忠
探礦山西允貞抗疏極諫不報已西河王知燧請開解州
安邑絳縣礦以儀賓督之指揮王守信請開平定稷山諸
礦帝竝報允允貞恐民愈擾請令忠兼領亦不納王殿災

氏姓譜

卷九

五末

魏氏

六

詔求直言允貞言咎在輔臣歷數趙志皋張位罪且曰前
二臣以二月加恩踰月兩宮災今年又加恩而三殿復災
天意昭然位等力辨求罷帝慰留責允貞邊臣不當言朝
事因屢推不用遂肆狂言奪俸五月頃之允貞疏舉遺賢
請召還王家屏陳有年趙南星鄒元標等疏留中以久次
進右副都御史二十八年春疏陳時政亦不省先是張忠
以開礦至後孫朝復至權稅誅求百方允貞每事裁抑會
忠杖死太平典史武三傑朝使者逼殺建雄縣丞李逢春
允貞疏暴其罪朝怒劾允貞抗命沮撓帝留允貞疏不下
而下朝疏于部院吏部尙書李戴都御史溫純等力稱允
貞賢請下允貞疏平議帝竝留中山西軍民數千恐允貞
去相牽詣闕懇寬兩京言官亦連章論救帝乃兩置不問
允貞父已九十餘允貞歲歲乞侍養章二十上廷議以救

使害民非允貞不能制固留之其年五月請益力始聽歸士民爲立祠已闕視者奏允貞守邊勞卽家進兵部右侍郎尋卒天啟初追諡介肅弟允中允孚

魏允中爲諸生副使王世貞大器之歲鄉試世貞戒門吏曰非魏允中第一無伐鼓以傳也已而果然時無錫顧憲成漳浦劉廷蘭竝爲舉首負雋才時人稱三解元尋與廷蘭舉萬歷八年進士張居正專政災異見而中外方競頌功德允中廷蘭各上書座主申時行勸之補救時行不能用允中尋授太常博士擢吏部稽勳主事調考功未幾卒允孚官刑部郎中亦有名

魏大中字孔時嘉善人自爲諸生讀書砥行從高攀龍受業家酷貧意豁如也舉于鄉家人易新衣冠怒而毀之第萬歷四十四年進士官行人數奉使秋毫無所擾天啟元

氏姓譜

卷五

五末 魏氏

六

年擢工科給事中楊鎬李如楨旣論大辟以僉都御史王德完言大學士韓爌遽擬旨減死大中憤抗疏力爭詆德完晚節不振盡喪典型語并侵爌帝爲詰責大中而德完志甚言曩不舉李三才爲大中所怒兩人互詆訐疏屢上爌亦引咎辭位御史周宗建徐揚先張捷徐景濂温皋謨給事中朱欽相右德完交章論大中久而後定明年偕同官周朝瑞等兩疏劾大學士沈灌語侵魏進忠客氏及議紅丸事力請誅方從哲崔文昇李可灼且追論鄭國泰傾害東宮罪持議峻切大爲邪黨所仄目太常少卿王紹徽素與東林爲難營求巡撫大中惡其人特疏請斥紹徽紹徽卒自引去再遷禮科左給事中是時恤典冒濫每大臣卒其子弟夤緣要路以請無不如志大中素疾之一切裁以典制四年遷吏科都給事中大中居官不以家自隨二

若頭給爨而已入朝則鍵其戶寂無一人有外吏以苞苴至舉發之自是無敢及大中門者吏部尙書趙南星知其賢事多諮訪朝士不能得南星意率怨大中而是時觝排東林者多屏廢方恨南星輩刺骨東林中又各以地分左右大中嘗駁蘇松巡撫王象恒恤典山東人居言路者咸怒及駁浙江巡撫劉一焜江西人亦大怒給事中章允儒江西人也性尤忤喉其同官傅槐假汪文言發難文言者歛人初爲縣吏智巧任術負俠氣于玉立遣入京刺事輸貲爲監生用計破齊楚浙三黨察東宮伴讀王安賢而知書傾心結納與談當世流品光熹之際外廷倚劉一燦而安居中以次行諸善政文言交鬪力爲多魏忠賢旣殺安府丞邵輔忠遂劾文言褫其監生旣出都復逮下吏得末減益游公卿間輿馬嘗填溢戶外大學士葉向高用爲內

氏姓譜

卷五

五末

魏氏

七

閣中書大中及韓爌趙南星楊漣左光斗與往來頗有迹會給事中阮大鍼與光斗大中有隙遂與允儒定計囑櫬劾文言并劾大中貌陋心險色取行違與光斗等交通文言肆爲奸利疏入忠賢大喜立下文言詔獄大中時方遷吏科上疏力辨詔許履任御史袁化中給事中甄淑等相繼爲大中光斗辨太學士葉向高以舉用文言亦引罪求罷獄方急御史黃尊素語鎮撫劉僑曰文言無足惜不可使搢紳禍由此起僑領之獄辭無所連文言廷杖褫職牽及者獲免大中乃遵旨履任明日鴻臚報名面恩忠賢怒矯旨責大中互訐未竣不得赴新任故事鴻臚報名狀無批諭旨者舉朝駭愕槐亦言申旨不宜旁出大中乃復觀事未幾楊漣疏劾忠賢大中亦率同官上言忠賢得疎太怒矯旨切讓尙未有以罪也大學士魏廣微結納忠賢素

裹爲奸大中每欲糾之會孟冬時享廣微偃蹇後至大中
遂抗疏劾之廣微愾蓋與忠賢合忠賢勢益張以廷臣交
攻陽示欵戢且曲從諸所奏請而陰伺其隙迫吏部推謝
應祥巡撫山西廣微遂嘆所親陳九疇劾大中出應祥門
推舉不公貶三秩出之外盡逐諸正人吏部尙書趙南星
等天下大權一歸于忠賢明年逆黨梁夢環復劾文言再
下詔獄鎮撫許顯純自削牘以上南星漣光斗大中李三
才惠世揚施天德黃正賓輩數十人無所牽引而以漣
光斗大中爲受楊錦熊廷弼賄大中坐三十矯旨俱逮下
詔獄鄉人聞大中逮去號泣送者數十人比入鎮撫司顯
純酷刑拷訊血肉狼籍其年七月獄卒受指與漣光斗同
夕斃之故遲數日始報大中屍潰敗至不可識莊烈帝嗣
位忠賢被誅贈太常卿諡忠節錄其一子長子學淨

氏姓譜

卷九

五

魏氏

六

魏學淨字子敬爲諸生好學工文有至性大中被逮學淨
號慟欲隨行大中曰父子俱碎無爲也乃微服間行刺探
起居既抵都邏卒四布變姓名匿旅舍晝伏夜出稱貸以
完父贖贖未竟而大中斃學淨慟幾絕扶輓歸晨夕號泣
遂病家人以漿進輒麾去曰詔獄中誰半夜進一漿者竟
號泣死崇正初有司以狀聞詔旌爲孝子

魏校字子才崑山人其先本李姓居蘇州葑門之莊渠因
自號莊渠宏治十八年成進士歷南京刑部郎中守備太
監劉瑯藉劉瑾勢張甚或自判狀送法司莫敢抗者校直
行已意無所徇改兵部郎中移疾歸嘉靖初起爲廣東提
學副使丁憂服闋補江西兵備副使累遷國子祭酒太常
卿尋致仕校私淑胡居仁主敬之學而貫通諸儒之說擇
執尤精嘗與余祐論性詞精義微學者稱之所著有大學

指歸六書精蘊卒諡恭簡

魏時光南昌人善舞雙刀崇正九年夏爲廣濟典史邑遭殘破長吏設排兵三百人委之教練其冬賊據蘄州河口憚時光不敢渡時光益募死士夜襲其營手殺數賊賊不敢逼俄賊大至部卒皆散時光單騎據高坡又殺數人賊環繞之韜斷被執不屈死其兄陳于上官却不奏兄憤發病死友人收殮之哭盡哀曰弟爲國死兄爲弟死吾獨不能表暴之乎具牘力陳乃奏聞贈廣濟主簿予恤典

魏敏輩縣人性至孝博通經史洪武戊辰進士第授吏科給事中母病謁告歸省未至而母卒敏卽之墓所哀慟水漿不入口者五日廬墓三年旦夕哭奠如初喪鄉里稱其孝事聞表其門

魏明德洪武中慶元縣丞愛民如子時青田縣賊葉香等

氏姓譜

卷九

五末

魏氏

充

在亂統兵者勦捕欲盡誅慶元連境民明德抵軍門涕請曰今以他邑悖逆連勦吾邑良民吾寧受死不忍傷吾民也主將乃止邑人咸感其德

魏宗字本敬南平人由國子生任台州府同知永樂間知寧波府政尙寬恕有幹濟才詢民情察利病而興革驗民丁稅以均其役揭示通衢猾胥莫售其奸由是訟牒遂息而公庭晏然

魏庸字宗道少孤克遵母訓勤學博覽長于作詩性尙恬退不干仕進自號止齋家雖無餘積食行乞者無吝色嘗以父沒而不及見母存而莫能報構思親春暉二堂太守陳公瑾爲作二堂記以表之少司寇劉公廉夫許其能談時務有王猛風子巖任本州陰陽典術致仕

魏浩咸陽人隱居龍巖遂號龍巖先生幼善記誦長通書

大旨子史律算書法亦無不研究尤長于詩賦給事中趙泰因作傳以識之

魏紳字廷佩曲阜人母卒廬墓三年成化間舉進士拜刑部主事轉郎中廣西有冒稱外戚者事覺被逮皆避不敢承紳一訊卽得其狀累遷都御史歲旱奏減民稅四分之

一策邊墻四十餘里增墩堡五十餘所上賜璽書文綺官至侍郎

魏文昌華容人有至性事父母極孝父獲死罪繫武昌獄文昌詣闕上疏願以身代高廟許之臨刑語其弟曰謹事二親如吾存時也遂伏法時年十有八歲邑中哀之

魏鏡慈谿人生有絕力善格鬪聞倭寇至海濱輒自奮曰誰無死者死而能衛桑梓庶幾爲義鬼矣乙卯賊由餘姚至鳴鶴縣令曹本率衆禦之兵敗鏡負縣令脫走賊復追

氏姓譜

卷九

五末 魏氏

廿

之踰杜湖嶺而南鏡乃操刃衝殺數賊賊斫傷其額猶憤怒力鬪竟死縣令爲之灑泣爲文祭之

魏葵字順甫蒲圻人嘉靖庚戌進士爲人質直亡他長好讀書博物洽聞一時海內知名士爭相交驩授刑部郎出守濟南解淄萊盜均章邱賦濟人德之晉山西副使罷歸

杜門不事家人生產而時時好著書里中後進之士爭師事之裳詩文好擬則古昔成一家言所著有雲山草堂集湖廣通志草凡若干卷

魏煥長沙衛人嘉靖己丑進士授嘉興府推官歷兵部員外郎擢四川僉事貞夷簡溫不以才智自見明習當時之務所在毅然身任之留心邊防能言勝敗之故至四川力振風裁無何卒所著有九邊圖考蜀東撫夷錄皇明拱衛

錄

魏光國字合虛東鄉人父廷用知龍門縣劄橋爲渡至今稱魏公橋光國萬歷進士授行人風節自許應詔言事語侵當軼廷推擬晉銓司忌者格之不報乞養歸著有文竿兼古堂集云

歷代列女

魏存華字賢安任城人晉司徒康公魏舒女也幼好道欲別居間處父母不許年二十四強適劉女生二子乃離室別寢羣仙來降教以神真之道授黃庭等經因設酒殽與衆真吟唱託劍化形而去世稱南嶽魏夫人

魏氏字木蘭恭帝時發兵禦戎木蘭有智勇代父出征歷年一紀闕十有八戰人莫及之凱還天子加其功除尚書不受懇奏省親及歸釋戎服衣舊裳同行者駭之遂以事聞于朝召赴闕欲納之宮中木蘭曰臣無媿君之禮遂自

氏姓譜

卷五九

五末 魏氏

七

盡帝驚悼贈將軍諡孝烈鄉人爲之立廟祀焉杜牧之詩彎弓征戰作男兒夢裏曾經與畫眉幾度思歸還把酒拂瑩堆上祝明妃

魏氏宋廷瑜妻定州鼓城人隋著作郎彥泉之後世爲山東士族父克已有詞學則天時爲天官侍郎張說少爲克已所重氏亦善屬文先天中隨夫自司農少卿左遷涪州別駕中路作南征賦以叙志因作書與說叙亡父疇昔之事并爲廷瑜申理說見之稱其詞甚典美以爲曹大家之流開元中廷瑜累遷慶州都督復轉廣州道病卒魏氏旬日亦殞人皆傷痛之

魏孝女字無忌夏縣人父爲鄉人衛長則所殺母遂改嫁女無兄弟及長常思復讎會從伯設宴長則預坐無忌奮起以篋擊殺之詣吏自陳請就刑戮巡察大使褚遂良以

聞太宗免罪給乘徙于雍州合長史以禮嫁之并給田宅
魏氏樊彥琛妻楚州淮陰人素聰慧善絲竹于歸二十餘
載房中雍睦琴瑟不廢夫病篤泣言曰幸以愚陋託身明
德豈意蒙招見禍同入黃泉是其願也彥琛答曰死生常
道無足多恨正宜勉勵撫成諸孤若相從徒死適足貽累
非吾所取卒後屬李敬業亂魏爲賊所獲逼合彈箏歎曰
夫亡苟活禍從吾手卽引刀斷指賊怒捨之俄又逼令從
順以刃加頸厲聲罵曰吾爲婦人立身天地間不辱汝反
逆願得速死賊乃斬之聞者莫不傷惜

魏夫人王大同馬之母性甚嚴王在湓城時年逾四十少
不如意猶箠撻之故能成其勲名

魏夫人虞美婦人嘗有詩云三軍散盡旌旗倒玉帳佳人
坐中老香魂夜逐劍光飛青血化爲原上草芳心寂寞依

氏姓譜

卷九

五末

魏氏

七

寒枝舊曲聞來似歛眉哀怨徘徊愁不語恰如夜聽楚歌
時朱晦庵語錄宋朝婦人能文者只有李易安與魏夫人
魏氏安陸人嚴大賓妻也夫卒子甫一歲氏不食七日姑
曰我奄奄待木矣汝死藐孤誰屬氏強起乃作柩室日持
孤兒泣室中會夏雨水溢氏以子屬姑徙避自赴柩哭須
臾水止又被鄰火家人怖走氏曰夫在吾何往忽聞空中
撲火聲火尋滅時嘆其節婦之感云

魏氏儀封人段整妻二十三夫亡矢志自守力織紉自給
卒養翁姑以天年終三子亦皆成立未幾長子安其妻胡
氏年十九守節如其姑成化四年事聞旌其門曰雙節

魏氏徐州人李剛妻學正魏賢女也年二十餘夫亡無子
誓死不嫁晝夜惟與夫靈座相對所居一室蕭然不蔽風
雨門扉常掩惟取薪水出入始啟之人不堪其憂魏處之

晏如績紡自給垂四十年

魏氏婦魏元父妻也。以才學著。帝嘉其才。召入宮。封為女侍中。

魏氏省察。汪元機妻。長沙衛經歷。廷軾母也。機卒。氏年二十三。軾甫週歲。孤寡相倚。為命勤劬。節儉備嘗。茶苦營吉。葬其三代。課子有成年。八十以壽終。邑令屢扁其廬。

尉氏鄭大夫尉翩之後。又音鬱。

歷代名賢

尉氏

尉長命。太安狄那人也。父顯。魏鎮遠將軍。代郡太守。長命性醇厚。有器識。扶陽之亂。寄居太原。及高祖將建大義。長命參計策。後高祖破四胡于韓陵。拜安南將軍。樊子鵠據兖州。反除東。南道大都督。與諸軍討平之。轉鎮范陽。城就

氏姓譜

卷九

五末

尉氏

七

拜幽州刺史。督安平二州事。州居北垂。土荒民散。長命以恩撫民。少得安集。尋以疾去職。未幾復徵拜車騎大將軍。都督西燕。幽滄瀛四州諸軍事。幽州刺史。卒于州。贈以本官。加司空。謚曰武壯。

尉興敬。長命之子也。便弓馬。有武藝。高祖引為帳內都督。出為常山公府參軍事。賜爵集中縣伯。晉州民李小興羣聚為賊。興敬隨司空韓軌討平之。進爵為侯。高祖攻周文。帝于邙山興敬因戰為流矢所中。卒。贈涇岐鹵三州軍事。爵為公。謚曰閔莊。高祖哀惜之。親臨弔賜其妻子祿。如興敬存焉。子士林嗣。

尉古真。代人也。太祖之在賀蘭部。賀染干遣侯引乙突等詣行宮。將肆逆。古真知之。密以馳告。侯引等不敢發。染干疑古真泄其謀。乃執拷之。以兩車軸押其頭。傷一目。不伏。

乃免之登國初從征庫莫奚及叱突隣並百功又從救賀
蘭破衛辰子直力靱復擊慕容寶于參合陂又彼平中原
以功賜爵東州侯加建節將軍太宗初爲鴻飛將軍率衆
五千鎮大洛城太宗西巡古真與奚斤等率前軍討越勒
部大破之獲馬五萬匹牛羊二十萬頭掠二萬餘家西還
泰常三年除定州刺史卒子億萬襲卒子盛襲古真弟太
真太宗初爲平南將軍柁州刺史

尉諾太真弟也少侍太祖以忠謹著稱從圍中山諾先登
傷一目太祖歎曰諾兄弟並毀其目以建功效誠可嘉也
寵待遂隆除平東將軍賜爵安樂子從討姚平還拜國部
大人太宗初爲幽州刺史加東統將軍進爵爲侯長孫道
生之討馮跋也諾與驍騎將軍延普率師次遼西轉寧東
將軍進爵武陵公諾之在州有惠政民吏追思之世祖時

氏姓譜

卷第九

五末 尉氏

七

薊人張廣達等二百餘人詣闕請之復除安東將軍幽州
刺史改邑遼西公兄弟並爲方伯當世榮之燕土亂久民
戶凋散諾在州前後十數年還業者萬餘家延和中卒第
八子觀襲爵卒子輪襲

尉眷諾長子也忠謹有父風明元時執事左右爲太官令
時侍臣受斤亡入蠕蠕詔眷追之遂至虜庭禽之大檀前
由是以驍烈聞太武卽位命眷與散騎常侍劉庫仁等八
人分典四部締奏機要加陳兵將軍文成時拜侍中太尉
封漁陽王與太宰常英等錄尚書事文成北巡狩以寒雪
方降議還眷諫曰今去都不遠而便旋還虜必疑我有
難雖方寒雪宜更前進帝從之遂渡漠而還帝以眷元老
賜杖履上殿和平四年薨文成悼惜之贈大將軍諡曰莊
尉多侯眷之子也少有武幹顯祖時爲假節鎮西將軍領

護羌戎校尉敦煌鎮將至鎮上表求率輕騎五千西入于
闐兼平諸國因敵取資平定爲效弗許高祖初蠕蠕部帥
无盧真率三萬騎入塞圍鎮多侯擊走之以功進號征西
大將軍後多侯獵于南山蠕蠕遣部帥度拔入圍敦煌斷
其還路多侯且前且戰遂衝圍而入率衆出戰大破之追
北數十里斬首千餘級因上疏求北取伊吾斷蠕蠕逼西
域之路高祖善其計以東作方與難之太和元年爲妻元
氏所害子建襲爵歷位給事中卒無子建弟那襲爵卒子
範襲

尉慶賓多侯弟子也善騎射有將畧高祖時釋褐員外散
騎侍郎稍遷左將軍大中大夫肅宗時議欲送蠕蠕主阿
那瓌還國慶賓上表固爭不從後蠕蠕遂執行臺元孚大
掠北境詔尙書令李崇討之慶賓別將隸崇出塞而返元

氏姓譜

卷五

五末

尉氏

七五

法僧之外叛蕭衍遣其豫章王蕭綜鎮徐州又詔慶賓爲
別將隸安豐王延明討之尋除後將軍肆州刺史時余朱
榮兵威漸盛曾經肆州慶賓畏惡之據城不出榮恨慶賓
舉兵襲之慶賓別駕姚和內應榮遂害慶賓僚屬拘慶賓
還秀容呼爲假父後以母憂還都尋起爲平東將軍光祿
大夫都督鎮汝陰還朝永安二年卒贈車騎將軍雍州刺
史又追加侍中司空公

尉地干眷之弟也機悟有才藝馳馬立射五的時人莫能
及太宗時爲左機令世祖少而善之卽位擢爲庫部尙書
加散騎常侍左光祿大夫領侍輦郎地干奉上忠謹尤善
嘲笑世祖見其效人舉措忻悅不能自勝甚見親愛參軍
國大謀世祖將征平涼試衝車以攻冢地干爲索所縶折
脇而卒世祖親往臨撫哭之甚慟贈中領軍將軍燕郡公

諡曰惠贈賜豐厚

尉力斤地于弟以忠謹開歷位御史中尉并州刺史有政績加冠軍將軍賜爵晉陽侯卒贈平南將軍力斤弟焉陳尙書安樂侯

尉聿字成興古真族元孫也性耿介肅宗時爲武衛將軍是時領軍元叉秉權百寮莫不致敬而聿獨長揖不拜尋出爲平西將軍東涼州刺史涼州緋色天下之最又送白綾二千匹合聿染拒而不許必諷御史劾之驛徵至京覆驗無狀還復任尋卒于州時年五十贈安北將軍朔州刺史子儉武定中開府祭酒

尉撥代人也父那濮陽太守撥爲太學生募從兖州刺史羅忸擊賊于陳汝有功賜爵介休男從討和龍遷虎賁帥轉千人軍將又從樂平王丕討和龍除涼州軍將擊吐谷

氏姓譜

卷九

五末

尉氏

七

渾獲其人一千餘落後吐谷渾小將率三百餘落來降尋復亡叛撥率騎追之盡獲而還以功進爲于遷晉昌鎮將綏懷邊民甚著稱績入爲知臣監出爲杏城鎮將在任九年大收民和山民一千餘家上郡徙各廬水胡八百餘落盡附爲民高宗以撥清平有惠績賜以衣服顯祖卽位爲北鎮都將復爲都將南攻懸瓠破劉彧將朱湛之水軍三千人拜懸瓠鎮將加員外散騎常侍進爵安城侯顯祖嘉其聲效復賜衣服轉平南將軍北豫州刺史後洛州民田智度聚黨謀逆詔撥乘傳發豫州兵與洛州刺史邱頓擊之獲智度送京師撥卒贈冠軍將軍諡敬侯

尉元字苟仁代人也世爲豪宗父目斤勇畧聞于當時位中山太守元以善射稱爲羽林中郎以匪懈見知稍遷駕部給事中賜爵富城男和平中遷北部尙書進爵太昌侯

天安元年薛安都以徐州內附顯祖以元爲使持節都督
東道諸軍事與城陽公孔伯恭赴之宋兗州刺史畢象敬
遣東平太守章仇擲歸欸元並納之遂長驅而進宋遣將
張永沈攸之等屯于下碇安都出城見元元依朝旨授其
徐州刺史遣中書侍郎高閻李璨等與安都俱還入城別
令孔伯恭撫安內外然後充入彭城元以永仍據險要乃
命安都與璨等同守身率精銳揚兵于外分擊呂梁絕其
糧道永遂捐城夜遁于是遣高閻與張讜對爲東徐州刺
史李璨與畢象敬對爲東兗州刺史拜元開府都督徐州
刺史淮陽公太和初徵爲內都大官旣而出爲使持節鎮
西大將軍開府統萬鎮都將甚得夷民之心三年進爵淮
陽王以舊老見禮聽乘步挽杖于朝蕭道成旣自立多遣
閒牒扇動新民不逞之徒所在蜂起以元威名夙振使總

氏姓譜

卷九

五末

屬氏

七

率諸軍以討之東南清晏遠近怙然入爲侍中都曹尙書
遷尙書令進位司徒十六年例降庶姓王爵封山陽郡公
其年頰表以老乞身詔許之元詣闕謝老引見于庭命昇
殿勞宴賜元冠素服又詔曰前司徒山陽郡公尉元前大
鴻臚卿新泰伯游明根並元亨利貞明允誠素位顯台宿
歸老私第可謂知始知卒希世之賢也公以八十之年宜
處三老之重卿以七十之齡可充五更之選于是養三老
五更于明堂國老庶老于階下高祖再拜三老親袒割牲
執爵而饋于五更行肅拜之禮賜國老庶老衣服有差旣
而元言曰自天地分判五行施則人之所崇莫重于孝順
然五孝六順天下之所先願陛下重之以化四方臣旣年
衰不究遠趣心耳所及敢不盡誠高祖曰孝順之道天埶
之經今承三老明言銘之于懷明根言曰夫至孝通靈至

順感幽故詩云孝悌之至通于神明光于四海如此則孝順之道無所不格願陛下念之以濟黎庶臣年志朽弊識見昧然在于愚慮不敢不盡高祖曰五更助三老以言至範敷展德音當克已復禮以行來授禮畢乃賜步挽一乘十七年七月元疾篤高祖親幸省疾八月元薨時年八十一詔賜布帛綵物二千匹温明祕器朝衣一襲并爲營造墳域謚曰景桓公葬以殊禮給羽葆鼓吹假黃鉞班劍四十八人

尉羽元之子也名犯肅宗廟諱頗有器望起家祕書中散駕部令轉主客給事加通直散騎常侍守殿中尚書兼侍中以父憂去職又起復本官詔襲爵加平南將軍高祖親考百司以羽怠惰降常侍爲長兼仍守尚書奪祿一周遷洛以山陽在畿內改爲博陵郡開國公後爲征虜將軍恒

氏姓譜

卷九

五末

尉氏

末

州刺史卒仍以爲贈謚曰順子景興襲

尉靜羽之弟也寬雅有材識世宗時爲尚書左民郎中卒贈博陵太守重贈鎮軍將軍洛州刺史謚曰敬子祐之通直散騎常侍護軍長史卒

尉珍在平人哀宗時爲濟州太守治東平決訟以公時東平置行臺以武臣監督訟獄滋興珍審斷發遣者多忤監督意徙河南後十年金亡而元興嚴惠武公實得領國政深知珍之德政舉其四子用之

貴氏

風俗通云陸終之後漢廬江太守貴遷司空中郎將貴霸晉武帝才人貴氏生東海王越望出常山明貴鐸河南人成化間錦衣衛指揮貴仁字子任汝陽人已丑進

士歷官知府

既氏

吳王夫槩之後避仇改為既氏漢既良南安長史南北朝既長之臨川內史

謂氏見姓苑唐以前無聞宋謂準太平興國登科

臚氏古氣字見纂要

卉氏

殺氏

畏氏

以上俱見姓苑

去聲

六御

御氏

周禮有御人之職其後為氏漢御長倩公孫宏故人

氏姓譜

卷九

五末

賈氏至七九

歷代名賢

御

御孫名慶為魯匠師莊公二十四年丹桓宮楹刻其柄御孫諫曰臣聞之儉德之共也侈惡之大也先君有共德而君納諸大惡無乃不可乎秋哀姜至公使宗婦覲用幣御孫曰男贄大者玉帛小者禽鳥以章物也女贄不過榛栗棗修以告虔也今男女同贄是無別也男女之別國之大節也而由夫人亂之無乃不可乎

御刀與梅蟲兒等時稱八要

御鞅初簡公與父陽生俱在魯也闕止有寵焉及即位使為政田子懽之御鞅曰闕不可並尊弗聽後田常執簡公于徐州簡公曰余早從御鞅不及此

喻氏

又音樹望出南昌姓苑云南昌有喻氏又有論氏今喻氏多作論氏

歷代名賢

唐

喻猛字驕孫豫章人和帝時蒼梧太守以清白為治郡人頌之曰於維蒼梧交趾之域大漢惟累迪以仁德

晉

喻合字匡孫南昌人好學不慕榮寵隱居廬山北阜布衣蔬食三十餘年武帝徵不起

南北朝

喻希仕南齊詔用釋奠先聖先師禮樂

唐

喻晃謁杜紫微不遇曰我詩無綺羅鉛粉宜不售

氏姓譜

卷五

六御

喻氏至

今

喻坦之工于詩與許棠張喬鄭谷張翥等同時號十哲有詩一卷

宋

喻樛字子才由南昌徙嚴州十六世祖愈藥仕梁至安州刺史武帝賜姓為喻樛性質直好議論少慕伊洛之學登建炎進士往謁趙鼎鼎時罷樞筦居常山因諷之曰公之事上當使敵沃多而施行少敵沃之際當使誠意多而語言少鼎奇之引為上客締與初鼎都督川陝辟為屬高宗親征樛見鼎賀曰六龍臨江兵氣百倍然公自度此舉果百萬全乎或姑試一擲也鼎曰中國累年退避不振敵情益驕義不可更屈故贊上行耳若事之濟否則非鼎所知也樛曰然則當思歸路毋以賊遺君父憂鼎問策將安出樛曰張德遠有重望方居閩不可終棄若使為江淮荆湘

福建等路宜撫俾以諸道兵赴闕府庫軍旅錢糧皆得專
之其來路卽朝廷歸路也。謁善之入奏。今沿江經畫大計
畧定。非得大臣相應援。不可。帝曰。然。遂起張浚。知樞密院
事。浚至。執謁。手曰。此行舉措。皆合人心。謁笑曰。子才之功
也。樗自是往來。謁浚間多所裨益。頃之。薦授祕書正字。兼
史館校勘。金旣退。師謁浚。相得懽甚。人以爲必並相。樗獨
言。二人立事。任人未甚相遠。若同處相位。萬有一不合。則
是賢者自相背戾矣。又嘗譬推車者。遇艱險。則相詬病。及
車之止。復欣然如初。士大夫于國家。亦若是而已。後皆如
其言。久之。秦檜怒。樗先言和議。非便言者。希旨劾爲訕謗。
出知懷寧。轉通判。衡州檜死。起爲大宗正丞。轉工部員外。
郎。知蘄州。孝宗卽位。遷提舉。浙東常平。以治績聞。淳熙七
年卒。平生善識鑒。宜和間。許其友沈晦當魁。多士建炎初。

氏姓譜

卷五九

六綱

喻氏

一

又謂張九成當第一。凌景夏次之。會風折大槐。作二簡。以
遺。後果然。謁嘗以樊光遠免舉。事訪樗言。今年省試。不可
無此人。未幾。光遠亦第一。其二女。方擇配。不與富人後。適
汪洋。張孝祥戚及第。

喻良能。義烏人。累官至太常寺丞。嘗進忠義傳二十卷。孝
宗深嘉歎賞。卽命頒行。以開縣男致仕。所著有諸經講義。
香山集。與忠義傳。

喻偁。字伯經。義烏人。慶元間。舉進士。歷慶元府觀察推官。
改奉議郎。僉書。鎮南軍節度判官。尋陞。朝奉郎。初。偁久從
諸緝紳游。幕中多新進少年。議論多不合。偁歎曰。吾髮已
種種。寧能與翩翩小兒較短長哉。遂請祠。而歸。所著有隨
類錄二百卷。蘆隱類稿五十卷。首論六經之功用云。

喻叔奇。王十朋贈詩并序曰。叔奇攝職合稽公事之暇。必

訪僕于民事堂欣然相得輒成一詩見意同舍同年友天
資迥不羣詩文侵晉宋兄弟類機雲梅市訪仙侶蘭亭集
右軍公舍時過我無酒亦論文

喻汝礪字迪儒仁壽人靖康初爲祠部員外郎不附和議
遂掛冠號捫膝先生

喻仲衡字平甫元江南財賦提舉汝政之子自少穎悟博
通羣籍繼而師事姚夫陶安得聞程朱性理之學行業日
益充裕縉紳先達皆稱爲畏友洪武中有司以賢良薦遂
符授台州知府到官後值荒旱春農乏種官廩有穀數千
石仲衡請于朝以穀貸民繼而秋成民食旣足公廩亦充
而尤盡心于學校

喻德昭臨川人洪武初父移鳳陽時德昭六歲父母俾所

氏姓譜

卷九

六御

喻氏

三

親育之年十四詣鳳陽求之間闕十年得見父于漢中屯
所而母已沒乃扶歸比卒廬于墓所哀慟常如初竟卒于
墓傍鄉人稱其孝

喻江字嘲之滕縣人知餘杭嘉靖四年調奉化圖書數篋
而已居官嚴毅儼恪吏畏之若神明奸猾舞文者皆屏跡
不敢近輕徭薄賦清心省事民皆樂業時丙戌大歉江約
已裕民凡相告許者輾轉論而遣之民亦悔而罷訟盜
賊屏息在任三年通前餘杭爲九載以力不能赴京棄其
牒而歸士民惜之爲立去思碑

喻茂堅豐城人領四川鄉薦登進士第授銅陵知縣治行
卓異擢御史恒守正忤時後守兩郡踐藩臬轉右副都御
史大理卿刑部侍郎進尙書歷事兩朝屢批逆鱗履虎尾
旣全其道又全其身且筮仕宦成清苦一節以尙書致仕

囊無餘金自奉簡約若寒素然隆慶改元贈太子少保諭祭葦子祐漂陽丞祐黎平知府孫應龍寶慶經歷應豸尋旬通判應台貴陽知府曾孫思恪戶部員外郎科第接武遂爲榮昌宦族云

喻良高縣人洪武中由舉人歷官有能名累遷太僕寺少卿官至廣東按察使存心寬平用法明允有大聲稱于時

喻一川字子執郴州人嘉靖壬辰歲貢篤于友愛與弟分爨以已子一弟子六產分如子數任贛州別駕居官俸祿

輒賑宗族

喻原英平江人正統六年出谷一千二百石助賑事聞于朝勅勞羊酒旌爲義民仍免戶役成化間其孫金亦出谷一千二百石勅旌如例

喻廷禮平江人家世好施萬歷三十二年邑缺穀種廷禮

氏姓譜

卷九

六御

喻氏至

全

出穀千石散給鄉鄰有司上其事旌爲義門

喻應問新建舉人天啟三年知邵陽縣勇于裁決左右有乘其公冗以行私者悉廉得之寘之不少貸時稱喻鐵耳喻謙光州人邑庠生母卒廬墓三年悲泣無間寒暑墓左忽產靈芝五本守臣白其事于朝特賜旌表

歷代列女

喻氏張孝祥妻也事舅始不豫竟至此離孝祥作木蘭花寄之有美玉中折覆水難收之句

喻氏婦姓莫氏喻應麟妻平湖人年二十五夫亡家貧苦節以孝經口授其子泰徵道徵年八十里中欲以節舉堅

辭不許

吏氏見姓苑漢吏宗王莽時人

諭氏

見姓苑望出南昌漢論璪河曲人東晉論歸豫章人撰
西河記何承天云音樹

豫氏見姓苑

歷代名賢

周

豫讓畢陽之孫也始事范中行氏不悅去而就智伯智伯
寵之及三晉分智氏趙襄子最怨智伯漆其頭以爲飲器
讓遁逃山中曰嗟乎士爲知己者死女爲說己者容吾其
報智氏之讎矣乃變名姓爲刑人入宮塗廁中挾匕首欲
以刺襄子襄子如廁心動執問塗者則豫讓也刃其扞曰
欲爲智伯報仇左右欲誅之襄子曰彼義人也吾謹避之
耳且智伯亡無後而其臣欲爲報仇此天下之賢人也卒
釋之讓又漆身爲厲吞炭爲啞滅鬚去眉自刑以變其容

氏姓譜

卷九

六御 豫氏

合

行乞于市其妻不識也行見其友其友識之曰汝非豫讓
邪曰我是也其友爲泣曰以子之才善事襄子襄子必近
幸子子得近而行所欲此甚易而功必成讓笑而應之曰
吾所爲此者以明君臣之義非從易也且夫委質而事人
而求殺之是懷二心以事君也吾所爲極難亦將以愧天
下後世爲人臣懷二心者居頃之襄子當出讓伏于所過
橋下襄子至橋而馬驚襄子曰此必豫讓也問之果然于
是襄子面數讓曰子不嘗事范中行氏乎智伯滅范中行
氏而子不爲報讎反委質臣智伯智伯已死子獨何爲報
讎之深也讓曰臣故事范中行氏范中行氏以衆人遇臣
臣故衆人報之智伯以國土遇臣臣故國土報之襄子明
然歎泣曰嗟乎豫子子之爲智伯名旣成矣寡人技子亦
已足矣子其自爲計寡人不復釋子使兵圍之讓曰臣聞

人主不掩人之義忠臣不愛死以成名君前以寬赦臣天下莫不稱君之賢今日之事臣固伏誅然願請君之衣而擊之雖死不恨非所望也敢布腹心于是襄子使使持衣與讓讓拔劍三躍呼天擊之曰吾可以下報智伯矣遂伏劍而死死之日趙國之士聞之皆爲涕泣

明

豫銑斬水人永樂癸卯舉人上饒知縣

據氏見姓苑明據成玉田人宣德中漏刻博士

慮氏見姓苑周慮癸南蒯家臣

遽氏見 字典

絮氏

尼據切漢書張敞傳敞使賊捕掾絮舜有所案驗師古絮姓也又女居切見平韵六魚明絮樂心并研人永樂

氏姓譜

卷九

六御

據氏至 金

中任勛縣丞

譽氏晉有平原太守譽粹明譽哲和順人宣德中山東濮州判官譽紹芳南海人嘉靖舉人譽大壯南海人萬厯中浙江烏程縣主簿萬姓譜作平聲恐非

鑣氏前漢古今人物表有鑣金楚大夫註鑣音慮

恕氏見姓苑

庶氏

急就篇庶霸遂註庶衛公族禮記子思母死于衛庶氏女也邾庶其來奔後亦爲庶氏

壓氏音署見直音

去聲

遇氏風俗通漢東安太守遇冲宋遇昌期望出東莞

氏姓譜卷百十九終

